

東
華
續
錄

東華續錄

乾隆七十二

臣王先謙敬編

臣周澗蕃恭校

秋七月乙巳諭軍機大臣等據李侍堯奏遊擊蔡漢回粵齋有河仙鎮目莫士麟暨暹羅裔孫詔萃稟二件並詢問蔡漢因何往返遲滯緣由一摺已於摺內批示暹羅僻在海外地勢遼遠固非聲討所及卽丕雅新篡竊鴟張自相吞併止當以化外置之若河仙鎮目莫士麟欲爲鄰封力圖匡復亦惟聽其量力而行更可不必過問但所請檄諭花肚番一說則斷不可行彼旣具呈懇告自當給發回諭因令軍機大臣代該督繕寫檄稟爲彼陳說利害俾知中朝大臣體恤外國代籌萬全自爲得體該督接到後卽行覓便發往俟彼有覆稟再行奏聞至遊擊蔡漢自上年七月起程直

至本年正月始回此等緣營惡弁原不可信其中必另有耽延情弊不得僅以在洋被風斷桅折舵藉詞搪塞並著該督將原駕船戶及隨往兵丁等逐一訊究務得確實情形具摺速奏毋得稍有徇縱外寄軍機大臣代擬檄諭一道檄諭河仙鎮目莫士麟曰爾鎮遠處海濱傾心向化 大皇帝崇嘉爾忱悃寵賚頻加且自暹羅殘破後裔流離爾欲爲詔氏力圖克復慕義尤可嘉尙茲爾以丕雅新逞兇偕據興兵攻討未能取勝聞花肚番已降服天朝欲求 聖旨宣諭使之恢復暹國以謝前愆在爾以爲其勢甚易顧未反復深思昧於事理非計之得也花肚番本篡奪餘孽怙惡不悛前此暹羅遭其劫掠國邑破亡人民塗炭其兇殘無賴爾之所知且彼旣與詔氏構怨於前安能望其匡復於後而丕雅新之敢於僭竊未必非私相勾結藉爲聲援假使彼引兵至境轉與丕雅

新狼狽爲奸是爲虎添翼一害未除一害滋益暹國燼後遺黎豈堪復罹荼毒浸假而及爾河仙兩敵並臨其何以濟卽幸而殄滅逆新復立詔後彼必自謂有德於暹羅遂欲攘爲所屬悉索敝賦惟所欲爲稍不順意殘虐立被譬之引寇入室禍由自致河仙唇齒之地庸能免乎且花肚曩者侵擾暹國猶是島夷自相仇殺無可藉口也今若授以中朝威命彼益自以爲兵出有名無復顧忌遂仗以恐嚇暹民誰敢與抗是又鬼蜮伎倆所必然 大皇帝豈肯於此狡詐蠱惑假以事權聽其貽患海外乎爾所請斷不可行本部堂不便爲爾妄瀆天聽爾不忍詔氏宗祧不祀且欲討逆繼絕用意良厚夫名正言順眾不能違以此號召諸府必有從而應之者且高烈祿坤未嘗不心乎詔氏徒脅於逆新之勢強顏相從爾鄰封尙奮同仇若輩聞之有不慷慨自勵者必非人情況前此

第以後期敗績若豫爲密約剋日舉事更無可慮者而以正定亂以順取逆勝負之勢較然爾自量力而行誠能一舉而殲渠魁復亡國遠近聞之孰不稱爾義推爾功本部堂自當爲爾轉奏大皇帝亦必獎爾守正扶危嘉予褒賞不亦美歟若爾所計則有害而無利實未見其可也爾旣以誠懇來告本部堂爲爾推究籌畫詳舉以示爾其善度之○以增海爲黑龍江將軍溫福爲理藩院尙書調瑚世泰爲吏部侍郎以綽克托爲刑部侍郎○丙午諭軍機大臣等前以高晉奏稱胡文伯與范宜賓不相和洽共事日久恐於吏治無益當經降旨高晉令將二人居官究係誰是誰非秉公據實查奏復據覆稱范宜賓雖知努力向上但辦理一切尙欠熟諳且於巡撫指駁之事不能虛衷等語是其曲自在范宜賓不便令其復爲藩司致公事參差貽誤但覈其平日尙無他過適有

副都御史缺出因令來京補授乃今日范宜賓奏到鳳陽等處報有飛蝗一摺據稱屢行具稟前往撲捕該撫未經批發及面告胡文伯復以飛蝗無定難於查看爲詞不令前往范宜賓不敢因循誤公一面通稟自往查看等語此其曲又在胡文伯而不在范宜賓地方遇有飛蝗卽屬員未經稟報爲巡撫者一經訪聞卽應身先率屬竭力往撲豈有屢經藩司稟請自往而該撫轉爲阻抑之理朕於臣工辦理公務其功過曲直從不肯稍存成見今如范宜賓所言又豈能爲胡文伯曲解耶所有摺內陳奏情節著胡文伯明白回奏○命和爾精額伍訥璽馳往古北口籌辦河工○壬子諭據吳達善等將辦理古州黨堆寨逆苗案內所有在事出力文武員弁周克開等奏請議敘一摺著交該部照例議敘至此案初發時經吳達善等奏係襲學海差人往苗寨查察以致逆苗抗拒

傷人似其事因龔學海激成朕以龔學海辦理丹江兵米一案不稟上司遽揭部科似一好事不知大體之人逆苗聚眾或果由伊苛求滋釁亦未可定且其言係魏涵暉在省得自伊子魏傳曾寄到稟詞自屬公論因降旨吳達善等於結案後查明參奏續據吳達善等奏稱龔學海因接閱土舍歐韻清稟報黨堆逆苗有擅自稱王之事隨差土舍往彼查辦等語乃屬分所應爲不得謂之喜事若當土舍稟報時竟爾置之不問或僅轉稟該道魏涵暉必且彌縫掩飾以致因循日久釀成大事則貽誤之罪轉無可辭今龔學海甫至古州聞有逆苗不法卽爲查訪尙知以地方公事爲重而魏涵暉在任日久於苗疆漫無整頓又不能豫爲覺察其咎實在魏涵暉而不在龔學海卽魏傳曾前次所寄魏涵暉之稟安知非因伊父平時常有嫉怨龔學海之詞遂從而附和其說其言更

不可信矣因復傳諭吳達善令其秉公查奏嗣據奏到果係龔學海聞報查辦是以香要等逆謀得早敗露又當逆苗聚眾時豫收下江船隻令其不得過河猖獗是龔學海辦理此案始終實力任事竟屬有功而無過而魏涵暉庸碌無能有乖職守豈堪復膺監司之任龔學海從前曾任道員其降調亦非大過魏涵暉見在交部嚴加議處所有古州道員缺卽著龔學海補授朕於臣工功罪惟視其人之自取從不豫存成見賞罰一秉大公總期覈實以示激勸此案前後查辦情由節次寄吳達善等諭旨具在著鈔發俾眾閱之當共曉然也○諭軍機大臣等據阿爾泰奏查辦小金川與沃克什土司構釁一摺意在勦撫並行所辦亦是番夷自相仇殺其事本不值一辦乃小金川敢於恃強侵占沃克什地方督提大員既親臨查辦自當速令解怨息爭各守境土何得任其頑梗

不遵但該督等屢次遣官撫諭僅就兩土司曲直立言番夷無知轉以內地大臣意存偏向欲爲和解調停不足以使之輸心畏服尙未得辦理此事要領莫若傳集小金川土司面爲開導諭以爾土司地本彈丸又非險要爾若稍有不馴大兵無難朝發夕至爾自度力量能與天朝相抗乎且爾從前屢被大金川欺陵滋擾大皇帝憫爾殘弱特發大兵征服爾得保守疆土數十年來安享太平今爾幸無外侮輒敢自作不靖侵擾鄰封屢經飭諭仍然執迷不悟是爾全不知感恩安分竟成一冥頑不靈之人設他日大金川復稱兵侵爾疆界肆行吞併爾卽窘極奔懇朝廷豈尙肯加之憐念爲爾維持保護乎爾若逞目前睚眦之忿不顧將來切膚之患其利害得失較然可見又何所恃以無恐爾當反復熟思惕然猛省禍福惟爾自取早自決擇毋貽後悔如此詳切申諭小金川

土司自必感發天良帖然服教勝於派兵會剿多矣該督等奉到此旨卽遵諭行仍將宣諭時該土司作何對答及其神情詞色若何迅速據實奏聞至阿爾泰雖係滿洲大臣此事乃地方邊務旣與提督董天弼會辦所用又係綠營弁兵非若軍營調派滿洲兵丁者可比若用清字奏摺恐彼此不能公同商酌而該督衙門所有筆帖式於清文亦未必盡皆精熟奏事轉恐不能盡達其情嗣後著槩用漢字會摺具奏將此傳諭知之○癸丑 上臨和親王弘晝第視疾○定大計卓薦俸次未滿三年者照督撫越次保題例察議○乙卯諭據寶光鼐回奏派撥旗莊人夫一事請將順義縣知縣王述曾三河縣知縣周世澐解任並傳東路同知劉義北路同知張在赴軍機處質問等語所奏膠執支離尤屬不曉事理此次直屬撥夫捕蝗無論地方官原係循照舊規旗莊民田均勻

派用卽如寶光鼎所云旗莊之夫或出或否到場難而較遲據此已足爲均派之明驗更何事嘵嘵置喙雖該督楊廷璋查詢時該同知知縣等或稍爲遷就其詞亦屬情理所有於事本無關緊要若因言語傳述參差小節遽令兩縣兩廳同時解任徒致曠廢公務殊覺無謂設因此數人赴質之故並將寶光鼎褫職對簿又復成何政體且亦不值如此張大其事至寶光鼎另摺所奏護田夫一項以若輩盡力巡查且至荒廢本業復爲鰥鰥過計以衣食無由取給爲虞所見更爲迂鄙可笑護田夫之設不過令於蝻子萌生時各隨本處田地按查或遇蝗孽長發會力撲捕並非使之長年株守田畔於三時農業槩行拋棄也卽如設兵防守汎地亦第於汎內輪番偵邏稽查又豈責其終日登高瞭望方爲斥候若如寶光鼎之論直是跬步難行有不聞而失笑者乎寶光鼎前此奏

覆惟知因事借題造作塵腐空文自爲解嘲地步今又將派夫一節連篇累牘鋪張條奏而於事體之可行不可行全無理會其拘墟輻輳之處正復不勝指摘猶且始終堅持臆說牢不可破向固知其僅一硜硜之小人毫無能爲乃不意執迷紕繆若此且以空言折辨互相指斥漸成門戶乃前明陋習此風斷不可長竇光鼐著交部嚴加議處尋議上得旨竇光鼐著革職○丁巳諭朕弟和碩和親王秉性純誠持躬端恪暮年共學友愛實深自備位親藩懋昭敬慎方冀六旬同慶棣萼言歡昨以偶嬰微疾暫請給假調理卽遣御醫診視尙意稍加攝治卽可就痊比知病勢加劇親臨省視見其形神委頓殊切隱憂面屬其安心靜養以期痊可遽聞薨逝深爲痛悼卽於次日親臨奠醑著派皇八子皇十二子穿孝賞內庫銀一萬兩治喪並派誠親王皇六子侍郎德成副都御史

志信經理喪事所有一切喪儀及飾終典禮各該衙門卽行察例具奏尋賜祭葬諡曰恭○諭太保大學士一等忠勇公傅恆才識超倫公忠體國德心孚契襄贊深資自早齡侍直禁近卽覘其器宇非常洵膺委任旋以金川建績錫爵酬庸用是擢冠綸扉綜司庶務盡誠匪懈罕有其比西師之役獨能與朕同志贊成大勳及崇爵再加堅讓不受尤足嘉焉昨歲進勦緬甸傅恆堅決請行朕亦以萬里懸軍情難深悉而廷臣中更無可當斯寄者因授爲經略統率勁旅專征傅恆自夏鳩濟師以後身先士卒艱瘁備經用能收服猛拱迨會師蠻驀襲擊新街斬馘擐旗賊皆潰竄遂進攻老官屯時傅恆業已身染沈疴猶力疾督勵兵眾晝夜兼攻剋期可下逆酋畏懼具書懇請解圍而朕亦因其地水土惡劣軍中多病先期降旨撤兵並遣醫馳驛往視春間傅恆於天津行在復命

見其形神頓異隱慮難以就痊猶冀其安居調理以臻勿藥詎自五月以後病勢日益加劇漸成不起每朝夕遣使存問賜以內膳羹糜俾佐頤養復閒數日親臨視疾見其有增無減軫念彌殷今聞溘逝深爲震悼所有衾禭之屬業經從優頒賜似此鞠躬盡瘁允宜入祀賢良祠並賞給內帑銀五千兩治喪並著戶部侍郎英廉經理其事朕仍親臨奠醑其應得卹典著該部察例具奏尋賜祭葬諡文忠○諭福隆安見在穿孝工部尙書事務著溫福署理○戊午 上臨和親王弘晝第大學士公傅恆第賜奠○諭大學士公傅恆溘逝昨已降旨從優賜卹復念伊錫封公爵向俱循用民公分例今辦理一切喪葬儀節著加恩照宗室鎮國公之例行以示優異○辛酉諭邁拉遜等查審陸宏方國秀控告劉永相偷用寄放銀兩一案省城銀鋪與藩司吏胥表裏作奸最爲弊藪今

何彪年承領藩庫傾換錢糧銀兩輒敢私行那用雖經事後追還其情罪甚爲可惡而原辦之前任知府誇喀知縣郭玉並不詳報定擬僅以口稟藩司顛預了事均有應得之罪郭玉著革職與已革道員誇喀俱交刑部查審至觀音保身任藩司旣知何彪年侵那作弊理應徹底根究乃於兌收清款之後遂置此事於不問亦不據實具奏藩司例得奏事若此等關繫錢糧要件匿不上聞則應行專摺入告者更有何事觀音保著革職一併交部質訊見任清苑縣知縣田澍接追劉永相等欠項雖係郭玉任內之事但監追日久任其延抗不還又未將前後欠借緣由逐一聲明揭報殊乖職守田澍亦著革職至劉永升係劉永相之兄見充該縣戶書劉永相若無所恃何至應追之項延閣經年其爲表裏作奸已無疑義此等蠹胥惡習不可不予以重懲劉永升著改發烏魯木齊

所有案內各犯俱著交刑部覈擬速奏該督楊廷璋布政使周元理未能早爲查出均難辭咎著交部嚴察議奏其原告陸宏方國秀領出官銀寄放銀號係向來常有之事且因其情急控告始得究出銀鋪舞弊情形乃竟擬以加杖致令兩敗俱傷則將來遇有銀號人等借端侵騙勢必顧畏吞聲不敢申訴其何以扶弱鋤奸所擬殊屬非是朕辦理庶獄一秉至公務期情罪允協適視其人之自取雖一杖之微亦不肯使之稍有屈抑將此通諭知之○諭觀音保兒已降旨革職貴州布政使員缺著三寶調補胡文伯前於撲捕蝗蝻一事布政使范宜賓欲自行前往屢稟不准亦不卽自赴督辦及觀望數日見范宜賓竟自去查捕始以奏明親往自圖塞責因令明白回奏今據奏覆復以辦理審案遲延爲辭伊回任二十餘日有何要件耽延似此玩視民瘼豈能復勝巡撫之任

胡文伯著卽降補湖南布政使其安徽巡撫員缺著裴宗錫補授

○壬戌以增福爲安徽布政使海成爲安徽按察使

由山東糧道遷

○乙

丑諭周煌見出學差其兵部侍郎員缺著劉秉恬調補刑部侍郎員缺著余文儀補授○己巳諭據倉場侍郎寶麟等參奏祿米倉監督因接收麥石與直省委員互相推諉一摺所奏甚不明晰此項運京平糶麥石若該監督有意藉詞勒掯不卽接收該監督自難辭咎若東省起運後途中防護不謹致有潮溼其咎專在東省原解之員或直隸接運後續經霑溼其咎又在直隸接辦委員乃實麟等不辨是非曲直將監督及直隸委員槩請議處而於東省解員置之不問亦不究其溼自何處已屬含糊然此猶不足以盡其辦理錯謬之咎該侍郎等見在駐紮通州麥石抵通聞有溼潤之處卽當就近前往驗看應令轉運京倉與否無難立辦乃聽其

率行運京及委員監督彼此推延實麟等又不親赴查驗致遲誤十餘日之久試問伊等所辦何事而在署養高竟置職守於不問耶似此顛預怠廢豈復能勝倉場侍郎之任瓦爾達著調補倉場侍郎實麟著調補盛京戶部侍郎仍革職留任俟瓦爾達到通州再赴盛京歐陽瑾著解任交部嚴加議處所遺員缺著劉秉恬補授此案監督推諉延捱及山東解員直隸委員如何致涇麥石咎在何人之處著尙書溫福卽日前往查明具奏再將貽誤之員一併交部嚴加議處○辛未以和靜固倫公主下嫁喀爾喀親王成袞扎布之世子額駙拉旺多爾濟○壬申諭前以實麟等參奏祿米倉監督因接收麥石與直省委員推諉遲延一案該侍郎等並不親赴查驗種種辦理不善已降旨將實麟調補盛京戶部侍郎仍革職留任歐陽瑾解任交部嚴加議處今據溫福查明覆奏則

實麟等於麥石到倉並不親身調度經理一任監督縱容花戶勒
指延捱是實麟等不但失於覺察竟置此事於不辦殊乖職守昨
以實麟平日尙屬謹慎於倉場要缺雖不相宜而盛京侍郎或尙
能勉奉職是以將伊調補今如此顛預怠廢卽盛京侍郎亦難
勝任且伊在倉場年久其咎較歐陽瑾尤重若同案異罰恐無識
者流疑朕因實麟身係宗室有意從寬不足以示平允朕於臣工
功罪一秉至公從不稍存畸輕畸重之見實麟亦著解任一併交
部嚴加議處所有盛京戶部侍郎員缺著塘古泰補授○明德卒
以諾穆親署雲南巡撫○以法明爲雲南按察使由驛道遷
八月丙子諭湖南布政使員缺著吳虎炳補授胡文伯見已革任
著加恩補授廣西按察使仍革職留任效力贖罪○戊寅兵部議
奏副將軍尙書阿桂於撤兵一事辦理倉皇及奉旨明白回奏又

巧爲掩飾請照例革任得旨阿桂近日辦理事務一味取巧疊干
罪譴已屢加寬宥今此案該部議請革任難以再爲曲貸所有領
侍衛內大臣禮部尙書鑲紅旗漢軍都統均著革去著以內大臣
革職留任辦副將軍事令其自效○己卯諭永貴著補授禮部尙
書觀保著補授左都御史均革職留任准用頂帶仍不准戴翎○
庚辰四川總督阿爾泰等奏據僧格桑親來叩見臣等遵奉 上
諭剴切開導僧格桑面赤汗流叩頭謝罪據稱我父子深受 大
皇帝厚恩從來安分不敢與鄰封滋事因沃克什土司欲以呪詛
之術害我父子性命由是發兵攻奪色達克拉自知理短願將地
方給我以爲禳解之費嗣委員至沃克什官寨色達克拉倚委員
在內又思背約調集多人欲與我等決戰我等惟恐受虧添兵屯
駐以爲防備並未敢於攻擊今奉面諭願將所得附近達木巴宗

之壘穆爾吉日古嚕各地方及所搶沃克什之母舅僧格並番民二十四名一併交出其沃克什願給地方之處仍聽眾土司調處亦不敢抗違自取罪戾等語臣等察看僧格桑神氣辭色尙知感激懼取罪戾其愧悔實出誠心當日卽將附近達木巴宗地方及所搶沃克什母舅番民一併交出其沃克什願給地方臣等未便繩以官法應聽各土司自行清理報聞○辛巳以直隸糧價昂貴命東安等處秋冬二季駐防折色兵米每石加價三錢○甲申諭軍機大臣等黃登賢前在京師奏添建倉廩及請將岳州幫船分撥荆沔等四衛兌運二摺戶部議駁甚是且伊面奏回任欲往丹陽查閱運河尤屬事外干與當經傳旨申飭令其覆奏黃登賢七月中奏摺或尙未接諭旨不及覆奏猶屬可原今則相距將及兩月且已經回署豈有尙未接奉之理何以本日之摺止報抵署日

期而於前降諭旨竟無一語奏及殊不可解若黃登賢明知前奏之非故爲隱而不言以圖混過則其不是更大矣著再傳旨申飭並著黃登賢將因何不行覆奏緣由據實回奏尋奏臣條陳建廠撥船二摺並面奏欲行看河一事已屬不諳事體及奉到廷寄諭旨又不卽行陳奏實屬昏愊請交部嚴加議處得旨該部嚴察議奏尋議照應奏不奏私罪律降三級調用從之○賜霍罕伯克那爾巴圖敕諭曰朕披覽來表爾繼爾祖額爾德尼爲霍罕伯克篤誠遣使奏請朕安甚屬可嘉使臣拜默特來時朕加恩賜宴茲特賜爾蟒段龍段爾其祇受再爾奏稱謹記爾祖額爾德尼訓詞較前倍加效力等語朕甚嘉悅嗣後爾當益矢篤誠恪遵法度約束屬下毋使滋事惟宜輯睦鄰封不可恃強陵弱一切懷遵喀什噶爾葉爾羌大臣等命令安常守分以期永沐朕恩○命撥通倉米

二十萬石於直隸備賑○撥帑銀五十萬兩於直隸備賑○諭嗣後賑恤之項部庫撥給時不准減扣平餘著爲令○乙酉諭今春山東撫臣富明安奏請登嶽祝釐且言該省臣民望幸誠切朕面諭俟秋成後降旨茲奏山左二麥旣獲大田豐稔比戶盈甯爰允所請於獻歲春和恭奉安輿撰吉啓蹕惟是巡蹕所至非但旬畿境內不宜復事繁文卽東省入疆以後亦不當綴景增華致滋糜費朕省方問俗念切觀民惟以閭里恬熙羣情愛戴爲樂若備陳彩飾徒耗物力實所不取該督撫其善體恪遵毋違朕命○丙戌諭顯親王曾賞穿金黃蟒袍並賞穿金黃朝服恆親王年逾七旬亦著賞穿金黃蟒袍朝服○命署兵部尙書豐昇額軍機處行走○己丑上奉皇太后啓鑒秋獮木蘭○命再撥通倉米二十萬石於直隸備賑○諭明歲輸免甘肅錢糧並免臨邊各屬

應徵番糧草束其河東河西額徵屯糧草束免三分之一○庚寅

以福德爲內閣學士由內閣侍讀學士遷○壬辰以羅源漢爲左副都御史

降調吏部侍郎○乙未 上奉 皇太后駐蹕避暑山莊○丙申諭軍機

大臣等本日據託庸素爾訥奏稱秋審班內有福建省陳招弟與

湯宋氏通姦毆死本夫湯乃明毀屍滅迹一案九卿等會審時將

湯宋氏仍照不知情擬以緩決未敢隨同畫題等語朕初閱情節

已降旨令刑部會同九卿再議繼閱溫福摺亦奏及此事因係伊

前在福建巡撫任內所改情實之案言之較詳此案湯宋氏本係

犯姦之婦且目覩其夫爲姦夫毀屍滅迹尙以檢柴溺斃誑告夫

兄卽擬以情實亦不爲過但向來辦理因姦謀死本夫之案其審

係本夫故縱賣姦者雖由姦婦起意同謀尙以斬決論罪不擬凌

遲則姦婦之不知情者其罪更當有閒若以爲伊夫令其姦則

從之教以拒絕則不從且目覩支解夫屍並不阻擋是乃責以大義天下之不知大義身犯刑辟者不知凡幾尙不能盡以禮義相繩何獨於此等淫蕩之婦而爲之斤斤責備乎總之湯宋氏之入於情實與否俱無不可而秋讞大典滿洲三尙書與刑部九卿異議交章論奏則於政體有關所繫甚大在溫福曾經承辦此案於分原所當言而託庸素爾訥則何所激而出此若果係國計民生要務滿尙書數人獨能持正不肯依阿眾論據實入告朕必深爲嘉許而此種尋常讞牘無關重輕實不值如此矯矯示異設伊等意在從寬或案犯亦係旗人則已將伊等治罪念所言尙係懲治淫兇且心無所爲故不加責但不和衷商榷顯立異同恐啓門戶之漸於事體大非所宜至劉統勳任大學士已久刑名又其專責當託庸等講論時自應委曲婉轉極力盡言以衷一是卽朕見在

所降之旨非劉統勳不能見及者何妨如此明白開說早爲定案
乃竟聽其兩議入奏劉統勳亦不得謂之識大體矣若僅令刑部
九卿再議尙恐未喻朕意著傳諭劉統勳與託庸等虛衷集議仍
令九卿等合詞妥擬入冊具題毋各稍存意見○戊戌裁江蘇金
山同知復改爲蘇州府海防同知○己亥 上自避暑山莊巡幸
木蘭行圍○癸卯諭據胡文伯參奏舒城縣知縣龔海採買穀石
分派部民富戶代爲買繳其不願代買之戶勒令交納幫買價銀
入己至數千兩之多此外尙有婪索鹽商及於命案得受銀兩情
事均屬大干法紀等語龔洵著革職拏問交該督高晉與案內有
名人犯嚴審定擬具奏摺並發至此案係胡文伯任內之事該縣
似此婪贓飭法胡文伯豈漫無聞見何以不早行查參直至離任
時始以一參塞責明係見裴宗錫將次到任恐其查出嚴參故以

一奏自留地步實屬有心取巧胡文伯著交部一併嚴加議處
九月甲辰朔吏部議准貴州巡撫宮兆麟奏思州府地非苗疆又
不繁劇應裁所管地方撥歸玉屏青谿二縣管理青谿歸鎮遠府
轄玉屏歸銅仁府轄從之○乙巳諭陳樹蕃見在病故著加恩賞
銀一百兩○丙午命阿爾泰爲武英殿大學士兼吏部尙書仍留
辦四川總督事○王子孫孝愉因病解任調王顯緒爲直隸按察
使以桂林爲山西按察使○四川總督阿爾泰等奏臣等見駐達
木巴宗色達克拉病痊來見臣等諭以爾本弱小土司何得以呪
詛挑釁自取禍患色達克拉自知錯誤懇求免罪並稱沃克什官
寨被小金川圍攻日久糧食已盡寨落已殘求住達木巴宗以便
修理更懇暫留土練數百名協同防守臣等查沃克什地方本係
瘠弱而色達克拉構釁鄰封致其侵害本不足加之愛護且川省

沿邊土司其中削弱者不少原無內地撥兵代防之理但該土司
既爲內地所轄亦難任鄰境欺陵因暫留把總一員帶兵二十名
駐紮達木巴宗又留土練四百名分防各卡俟數月後小金川如
果安靜而沃克什亦稍爲整頓陸續撤回至沃克什番民所種之
麥已被蹂躪見在乏食應給口糧籽種使得久長安業報聞○甲
寅命五城散給煮賑銀米○戊午 上駐蹕避暑山莊○壬戌以
朱椿爲廣西按察使由湖北
鹽道遷○癸亥以楊景素爲甘肅布政使譚
尙忠爲河南按察使由廣東高
廉道遷○庚午軍機大臣等議准御史穆
隆阿奏請將伊犁回城各將軍大臣等養廉按數目多寡酌量裁
減添給隨往之章京每月銀十五兩筆帖式每月八兩其米麪等
項仍照舊支給從之○撥熱河四旗喀喇河屯三廳穀六萬石於
古北口備用

冬十月甲戌 上奉 皇太后自避暑山莊回鑾○乙亥諭本日
閱順天府進呈恩科鄉試錄內有中式舉人姓名與已故尙書張
照全同者其人籍隸宣化該處爲直隸邊境見聞僻陋或偶然適
合亦未可知但張照係舊日大臣且其學問字法近所罕有豈新
進後生所能幾及即使心存慕蘭亦不應矜妄若此又旗人有名
乾元者不知此二字著於易義豈臣下所能命名均著禮部查明
卽行更名註冊○庚辰 上奉 皇太后還京師○辛巳召崔應
階來京以鍾音兼署閩浙總督○壬午召阿爾泰來京以德福署
四川總督吳達善兼署湖南巡撫○召薩載來京以李湖署江蘇
巡撫○癸未諭從前暫開捐例原屬一時權宜以遂海內士民急
公上進之願究於事體非宜停捐以後曾有奏請再行開例者朕
皆斥而不允今國家帑藏充盈儲積廣有朕方屢次加恩普蠲糧

賦惟期藏富閭閻國用更無虞不足開捐一事竟當永遠停止至於見行事例如報捐貢監並微末職銜及封典加級等項皆於名器無妨原可仍聽照舊捐納因思未登仕籍之人冀邀冠服章身並有加捐實級請封藉以顯揚者自屬人情之常且所指止係虛銜既無礙正途銓選亦不致濫竊誤公若僅以末職卑階爲限未免阻人希榮之志或可推廣其例量以何銜爲止俾伊等各隨所願量力自爲報捐至降革留任人員原屬因公處分且其人尙不至於擯棄是以量予加恩俾得在任自效但一經議處卽停其升轉直待數年無過方准開復從前曾有捐復之例復經部議刪除第念此等人員內未嘗無可及鋒而用之人若以微眚淹滯多年亦覺可惜自當仍准援例捐復俾得黽勉自新以上各條應如何定例之處著軍機大臣會同各該部詳悉妥議具奏尋議見行捐

例外官自未入流以上至州同爲止武職自把總以上至遊擊爲止並無京官職銜今擬照豫工例京官自未入流從九品及一應小京官以上至郎中爲止外官自未入流以上至道員爲止至武職舊例係捐至遊擊職銜已屬三品毋庸再議俱准其捐納職銜不准選用從之○諭本日梁燾鴻以選補四川永甯道缺具摺謝恩內有總漕任內因米色潮潤辦理不善降調之語意欲將所得過愆輕減其詞以飾人耳目殊不知處分緣起不明非特無以見該員前後黜陟之由卽朕進退人材始終不得已之苦心亦難以共喻不得不爲明白宣示梁燾鴻係朕所深知其人本一忠厚無能爲之人前者第因其久任藩司尙無大過是以特加擢用乃自任總漕以後辦理動形竭蹶且聞其有耽飲好逸之習豈可復膺重寄適遇有處分之處因卽照部議降調若米色偶有潮潤亦凡

爲總漕者所常有使其別無他故何至遽以公過去官梁翥鴻豈得僅援此爲解嘲地耶朕臨御三十五年於內外大小臣工功過勸懲一惟其所自取從不肯令有絲毫屈抑每念國家得人不易豈能一遇因公望誤卽加罷斥凡於部臣按例議處之案無不詳悉披覽卽官小秩卑者猶以事非私罪量予從寬留任何況大員今大員中革職革任屢犯而從寬留任者不可屈指數其有照議實予降革者則必統覈其生平實不足以稱任因爲明示懲創俾眾人共知所儆此朕從來用人權衡慎重之本懷自信可與天下共白而中外臣工宜亦無不共見共聞梁翥鴻不自維獲譴之故猥思以小過自文恐無識之徒見其摺奏或從旁代爲稱屈於黜陟本末且無由共喻然梁翥鴻素不諳曉文義卽此摺亦或假手俗幕所爲原屬不值一噓但其措詞失實於朕造就羣材之意

殊有關係是以明降此旨通諭中外知之○癸巳諭和碩和親王
王爵著永璧承襲照永瑋例在乾清門行走平日不必戴翎至隨
駕行圍時仍著戴翎○甲午諭軍機大臣等據阿桂等奏稱老官
屯賊首諾爾塔遣人致書請停止今歲進兵等語今歲進兵原因
緬匪生性奸猾言語翻覆欲使賊匪震怖但今所派兵數無多卽
進攻亦不過在賊邊境擾其屯莊而已今諾爾塔旣已遣使前來
今歲暫止進兵尙屬可行但都司蘇爾相在老官屯並不與賊匪
抗言竟似順從賊匪而阿桂等並未詳察卽所答書札詞意亦謬
朕辦理緬匪一事原非本意然事須可以完結時始可完結豈可
因伊等心存畏懼因循中止耶彰寶係由外任錄用之人於錢穀
刑名尙能籌辦用兵事伊未曾閱歷尙不足怪至阿桂在軍機行
走有年朕平素如何辦事豈不知之乃不知體貼朕意和衷共濟

卽如辦理緬匪一事其可以中止與否阿桂非不知也伊竟飾詞
枝梧是存何意著傳諭嚴行申飭明年進兵時儻緬匪復遣人致
書是顯爲狡計以緩我師應將伊遣來之人盡行監禁卽乘賊不
備起兵前進此等事將軍等俱應豫籌若必待朕一一指示爾等
所司何事見所留緬匪二人卽派委妥員解送來京並嚴飭所派
兵弁於沿途加意看守儻有疏縱阿桂更當得何罪並諭令知之
又諭阿桂等奏接到蘇爾相稟詞及諾爾塔書字隨代哈國興給
與回文一摺其識見詞意種種錯謬不知是何肺腸已另降清字
諭旨嚴飭阿桂等旣欲給以回書自當剴切駁飭義正詞嚴庶賊
匪稍知畏懼若照阿桂等所給回文彙迴體措詞輒弱無一語切
實顯露遷就了事之意徒見輕於賊匪且必爲所竊笑尙肯將羈
留之人送還乎至仍可反悔句尤爲大謬不通緬匪自去冬遣人

至軍營求降情願送還內地之人並奉表納貢始解老官屯之圍
乃延捱三四月之久杳無信息明係匪酋生心反悔因代彰寶作
檄褫諭令遣人齎往詰責實在情形如此阿桂身親目擊豈尙不
知就裏乃轉云仍可反悔竟似天朝亦有反悔之事有此立言之
體乎阿桂非不曉文義者何竟悖理不通若此至回書內自應先
責其違誓逾期之罪繼則申明前次遣人傳檄之意以爾等猶如
蛆蟲螻蟻一般貢表之有無遲速原亦無關輕重並不向爾催促
至所留內地之人有何難辦而遲久不行送還其過實在於此因
遣蘇爾相持檄傳問爾復敢將蘇爾相羈絆不放爾取罪更重尙
敢狡詞抵飾乎至嚴守關隘禁止交易實因爾屢次反覆自取斥
絕何得轉欲枝梧詭問爾自思爾種種罪惡實爲覆載所不容任
爾狡譎伎倆我等豈不能窺見底裏鬼蜮之計又將安施如此嚴

切指斥方爲得體亦不失將軍大臣實心任事之道阿桂等惟思以婉詞完局而不綜計前後情事此事如何歇手阿桂等自問尙得謂之稍有天良乎且阿桂等不但與賊匪回書意存餒怯卽其摺內所稱緬甸貢物從前聞有象隻甌子故賊匪狡詞聲敘微露其意以掩其貢表揆延之迹等語竟是在朕前欲代緬匪婉言說和尤出情理之外朕於此事並非必於欲辦前此用兵實出於萬不得已然猶待以經年而後動早已屢降諭旨卽如今年賊匪留我齋書之人意欲激我出兵朕實洞燭其奸諭令不可墮其狡計朕之心事阿桂豈尙未喻目前如果實有可以完結之勢朕豈不願邊圉無事若以阿桂等之掩耳盜鈴並扭於唾面自乾之見朕實有所不能且令緬匪輕視中國必不能速完此事阿桂等身爲大臣委以邊夷重務若僅籌畫未到尙可諒其爲才識所限而此

等處非伊才識所不能到者也乃竟不能體朕深衷與朕同心妥辦思之實可憤懣至閱蘇爾相稟詞僅述諾爾塔向詢之語並未以其背誓狡悔罪蹟抗詞切責且轉代其言總是疑心交易人不來恐怕天朝不完事其人竟喪心病狂或已降順緬匪爲之代進說詞情罪甚爲可惡若緬匪將其送還仍遵前旨詳晰訊取供詞明確卽於次日當眾緬匪之面正法示眾蘇爾相奉差傳檄甘心受賊人羈絆已損威重今其稟詞又復如此不但其身爲國法所不容卽其子孫亦當加之罪譴向來遇有宣力效忠之人必錄敘其後裔似此負恩無恥之犯其妻孥亦豈得置之不問賞罰原應相等見交兵部查明該犯原籍另行查辦外若係籍隸雲貴著彰寶卽飭所屬將伊家屬鎖拏派委委員解送刑部嚴行治罪至蘇爾相之稟如此乖謬見者應無不切齒阿桂等竟恬不爲怪摺內

並無一語提及是誠何心著阿桂等明白回奏並將此詳切嚴行
申飭○乙未諭軍機大臣等昨阿桂等奏緬匪差人遞書隨給與
回文一摺閱其奏摺及文彙頗有急欲了事之意甚屬錯謬已降
旨嚴行申飭但伊等錯謬處甚多尙有前諭所未盡者如交易一
節緬匪情形本與俄羅斯不同俄羅斯地雖富庶而茶布等物必
須仰給內地且其每年貿易獲利甚厚不能不求我通市中國因
得就所欲以控制之若緬匪與畜類蟲蟻無異茹飲穢惡迴與人
殊並非急需內地之物卽向來交易彼亦無大利可圖且其境與
洋通諸貨尙可購之海舶雖不通商實不足以制其死命前曾詳
諭及之阿桂等因其書詞及蘇爾相稟均言買賣事輒信緬匪此
次差人遞書專爲求通交易所見已左且視此爲可以敷衍完局
之機遂以柔輒言詞答覆希圖遷就尤屬大謬無論禁絕交易實

非賊人所畏彼不過藉此爲詞斷不宜恃爲可操勝算即使賊人微有通市之望我之駁彼亦當詞氣愈嚴身分愈重彼或懼而懇求若稍露餒怯形迹措詞失體徒然見輕於賊彼尙何所忌憚乎卽如近年辦理俄羅斯交易一事中國行文屢加斥詈彼仍堅籲通商始令稟受教約俯允所請阿桂前在軍機處皆所目擊豈竟全不記憶臨事茫無主宰耶至緬匪所遣三人阿桂等酌留其二所辦雖合但賊匪性情狡謫彼旣留我持檄之蘇爾相鍾朝用等豈不慮我亦留其齎書之人其敢於竟爾遣行者必轉冀我拘留得以探聽內地消息且所遣三人一爲小頭目擺扎機一爲他矣細一爲波甕阿桂等因留其小頭目及波甕而將其次之他矣細遣回阿桂之意未嘗不以小頭目爲彼稍有關係之人留而不遣尙自以爲辦事周到獨不思緬匪詭計百出或將彼處極無用之

人冒充頭目而以其得力者潛列於次以防我羈留亦鬼蜮伎倆所必至阿桂等果何所據而信擺扎機之實係小頭目又何所爲而將其次之他矣細放回設或因其應對稍明將伊遣去豈不轉墮其術中阿桂等辦此事時自應細察其中之最無能者令其歸而傳語何竟巖略若此阿桂才識於此等情節皆非不能見及者何以全未深思熟計率意徑行不能審慎以處其良心尙安在乎又據奏總兵哈國興等訊問緬子其謬更不可解哈國興於去歲在老官屯與緬匪等接見傳語實有粉飾通融之處恐仍留在軍營不免迴護誤事因將伊降補貴州總兵前諭極爲明晰此時令將伊調至永昌第因其在滇年久熟悉邊外情形令其領兵襲擊較之生手自稍得力並非委其協辦緬事阿桂等或因諾爾塔書字專呈哈國興卽代爲作書令其出銜行文尙無不可而此事則

不當使之與聞若因其見辦襲擊之事遂將緬匪一切要務槩令干與則海蘭察亦係派出帶兵者豈亦當委其同辦乎朕之不令哈國興在滇實因其深染綠營惡習所言殊不足信而去冬緬匪求降情願送還內地之人等語皆哈國興與之議定若果所辦切實何至賊人之頓萌反悔今復令其訊問緬子彼復從中損益其詞其真情更不能得所繫甚大阿桂等甯不籌畫及此竟似此事非哈國興不行而謂彼至滇亦若專爲此事設世無哈國興將置緬夷之事不問乎昨歲老官屯受降之事尙疑哈國興誑詞瞞哄經略將軍今視阿桂所爲竟是阿桂授意哈國興令其捏飾虛詞欲圖完事因大學士傅恆正在病中遂思以此共爲蒙混其心尙可問乎著再傳諭嚴行申飭將此情節仍一一明白回奏○戊戌申禁宗室王公容留僧道星相人等○定部員兼攝六庫限三年

更換例○己亥命再撥部庫銀三十萬兩於直隸備賑

十一月乙巳諭前以大學士忠勇公傅恆體國公忠鞠躬盡瘁已降旨入祀賢良祠復念傅恆曩者金川奏績時以其祖父世篤忠貞流光鍾慶會諭令建立宗祠自其曾祖哈什屯下官爲春秋致祭今傅恆自應令其一體入祠酬庸俎豆至尙書果毅公阿里衮宣力殫忱克彰勞動昨歲賜卹時曾令入祀賢良今思其先世額亦都遏必隆並以崇勳建有宗祠得膺祀典阿里衮亦應附食邀榮而其父領侍衛內大臣音德尙未列入著與阿里衮一併入遏必隆宗祠用獎勵蓋該部卽照例行○軍機大臣等議准副將軍阿桂等奏請賞還戶撒土職額國宣後裔額君愛戶撒長官司土司腊撒土職蓋世祿後裔蓋邦榮腊撒長官司土司均歸騰越州管轄照例頒給號紙印信從之○壬子改天津府理事同知爲古

北口理事同知○癸亥諭軍機大臣等緬匪恃其險阻煙瘴料內地之人不能受此激我進兵而又拘留蘇爾相計殊狡猾甚屬可惡固不可墮其術中若置之不問又於天朝體統有關是以降旨令每年少派兵丁乘其不備往剿並蹂躪其地賊力自然疲乏昨據阿桂彰寶等奏請各派兵由猛密一路攻剿朕以伊等之意尙屬奮勉況僅於沿邊撲擊亦無緊要是以允其所請但思去年特遣將軍大臣出派滿洲索倫吉林等兵數萬攻擊並未滅賊僅至老官屯半途而止今各處兵俱撤彼處止剩綠營兵卽派侍衛等往與去歲兵力懸殊焉能望其克奏膚功況猛密在老官屯之東南儻我兵過後賊匪從後阻斷何以處之且進兵所需糧石甚多伊等如何備辦摺內並未聲明惟含糊奏稱調兵進取是存何意或阿桂等因賊本難辦不願進兵姑爲此奏以嘗試則大謬矣爲

臣子者辦理國家政務理宜籌畫妥協務期事有實濟豈可因事較難遂將就以一死了事卽阿桂有可殺之罪亦當明正典刑朕豈肯使賊匪戕害以壞大事阿桂如此居心實屬良心喪盡豈能逃朕洞鑒耶著傳諭阿桂等令其據實明白回奏至哈國興在彼最久彼處事件伊皆深知並著傳諭哈國興將如何辦理之處奏聞候朕另行裁度再降諭旨○乙丑召宮兆麟來京以三寶署貴州巡撫○辛未以富勒渾爲浙江巡撫王直望爲浙江布政使由山東按察使遷○壬申諭向例應封宗室特派大臣等考試按照等次復封原欲使宗室勤習騎射繙譯伊等得以承受國家優恤隆恩但此內業經考試與應封之例不符者若下屆仍准考試未免太無區別不足以昭勸懲所有此次考試例不應封之永修永封景煥和倫泰除此次停封外嗣後俱不准其再入下屆考試之內將來

應封宗室等如有考試與應封之例不符者俱不准其再入考試
將此永著爲例○以姚立德爲山東按察使

由江南淮
徐道遷

十二月甲戌免新疆本年額糧十分之三○乙亥諭今日偶有詢
問四阿哥之事遣人至書房傳旨知四阿哥因祀神竟未進內祀
神行禮原在清晨祀畢仍可照常進內乃四阿哥藉此爲名一日
不進書房殊屬非是但較之夏間八阿哥自圓明園擅行入城者
其過稍輕此次姑從寬免責向後如不知省改一經查出不能再
爲曲恕其師傅諳達所司何事著卽查參議處○丙子諭崔應階
歷任督撫向日辦事頗能認真近歲以來履行錯謬恐伊年逾七
旬精力不能振作因降旨令其來京陛見今召見奏對察其神志
果遜於前但未至於衰邁封疆重寄自非所宜而總漕事務不繁
尙堪勝任崔應階著補授漕運總督高晉俟崔應階到後仍回省

城專辦總督事務其閩浙總督員缺見令鍾音兼署候朕另降諭旨至崔應階於辦理楊開鼎等將駕廠應修戰船被水衝擊僅令賠補了事不卽據實參奏殊屬非是仍著交部嚴加議處○以裘日修爲工部侍郎由順天府尹遷○己卯諭裘日修著仍兼管順天府事務其順天府府尹員缺著吉夢熊補授寶光鼐前因捕蝗一事照部議革職但究係拘鈍無能尙非大過所有通政使司副使員缺著加恩令其補授○庚辰諭向來州縣官升用京職者有卓異應升及卽升俸深三項其中惟俸深之員多因事簡之缺歷任日久循資按格升授卽令在外亦不必盡能見長原無庸議至卓異人員多係才能出眾特薦剡於地方事務素稱諳練而卽升者或錄其微勞或獎其稱職均經督撫甄覈亦多有外任得力之員及一經循例內升雖有遷擢之名轉令投閒置散不獲展其所長

該員既日就頽靡而在外有司又少一堪資驅策之人於器使人材慎重吏治之道均無裨益嗣後凡州縣已升京職人員於吏部月選後俱著直省督撫量該員年歲才具填註切實考語送部該部另班帶領引見候朕裁奪分別內外錄用其從前由外任已經升補京缺者並著該部查明卽帶領引見再行酌量降旨至行取之例久經停止但見在京員中或有前由行取內升者並著查明亦卽帶領引見○壬午命五城粥廠每廠日增米一石○乙酉諭范宜賓於藩司任內因捕蝗不力節經部議降調無缺可補念伊前爲御史時尙屬黽勉著加恩仍以御史用○諭向來吏部定例四品以上京堂降至六品以下者旣無應補之京堂員缺又以京堂品秩崇優若補用司員與體制不合遂停其補用殊屬非是京堂品級雖優如因事獲譴旣經予降自應按品授銓用人乃朝廷

大權黜陟進退惟視其人之自取設官雖有崇卑示謫本無同異卽由崇階而降爲末秩惟上所命孰敢抗違若拘堂不降司之說輒以曾膺高位不屑於復就下僚是國家詔祿之典竟任臣下自專揀擇紀綱之謂何且以堂官降爲司員與體制又有何礙若因而停其補用則此等人員一經鑄級遂致擯錮終身所謂愛之適以害之於伊等又有何益此皆相沿前明陋習不可爲訓著該部另行改議具奏尋議奏嗣後除降至從五品以上係有缺可補之員仍照例辦理如降至五六品以下應與各項降官一體以對品之缺敘補從之○丙戌諭軍機大臣等前據阿桂奏緬匪遣人送書卽作回書令他矣細齋回餘人俱留未遣朕卽降旨申飭今再四思維伊等所辦大錯緬匪狡獪我遣往之人彼旣拘留必遣微末緬子不遣真正頭目我若遣之使還賊匪可以得我消息卽留

而不遣彼亦無所顧惜且賊匪留我多人不行送還而賊匪遣來之人我反放回有是理乎阿桂等一聞賊匪遣人前來卽謂可以草草了事並不詳計卽將他矣細遣回不但賊匪可得我消息且轉爲其所輕阿桂等亦意料不到乎此事在阿桂彰寶二人係出於何人主見著據實明白回奏賊匪此際已得我消息諒再不遣人前來萬一復遣人來斷不可遣回卽全行送京今年雖不進兵若依阿桂之意一味草率完事亦斷不可從前平定西北兩路往往不利其後反得乘機奏功因得平定準夷回部今辦理緬匪殊非西北兩路可比此皆由阿桂等辦理不善所致坐失機宜然緬匪獲罪於天滅亡有日我宜相機辦理近據阿桂等以老官屯賊目諾爾塔遣人送書前來懇請今年不必進兵而我今年自遣蘇爾相後並未另遣人去今阿桂等復將他矣細遣回賊匪聞今年

不進兵信息必不設備此機斷不可失明年瘴退之後乘其無備整旅勦滅賊匪方爲妥協但我兵明年進發斷不可稍露形迹卽騰越等處人亦恐有潛行通信與賊者宜密而又密著順便傳諭阿桂彰寶此際密訪識路人按該處地方形勢詳問何路瘴輕利於進兵如何整兵進勦使賊匪防備不及之處通盤籌算詳細妥議具奏○庚寅諭丁憂回旗在原衙門行走之滿洲蒙古道府人員及卓異候升丁憂回旗之知縣以上等官並理事同知通判曾經卓異內升者俱查明帶領引見嗣後著軍機大臣三年題奏一次○秦勇均因病解任以畢沅爲陝西按察使○吏部議奏貴州巡撫宮兆麟於辦理運京鉛斤奏報起運日期前後不符及戶部參出又不自行檢舉請照例革任得旨宮兆麟前在湖南按察使任內辦理張宏燧一案與巡撫常鈞不肯隨聲附和辦事尙屬認

眞是以疊加擢用升授封疆近見其所辦事件動多鷹率貽誤惟恃口舌爲能毫無實際難以復勝巡撫之任宮兆麟俟到京之日再降諭旨其貴州巡撫員缺著李瀚補授○辛卯以吳壇爲江蘇布政使調胡季堂爲江蘇按察使降宮兆麟爲甘肅按察使○壬辰諭御史陳聖時摺奏火器營房工程經督辦大臣奏請交內閣六部都察院派員承辦御史有稽察刷卷之責若分辦工程恐彼此意存瞻顧與從前兼部事屬相類合行停止等語所奏非是工程處派送御史於承辦之中兼寓稽察之責該工支放奏銷其中如有情弊自當隨時糾劾其職掌正屬並行不悖况派工御史數止二員其言官之未經司工者尙數十人該工設有弊端伊等一有風聞獨不當據實舉發耶其於官制職掌有何妨礙至該御史以御史停止兼辦部務爲詞不過借爲援引之名欲巧行其敦體

好名之計於政體尤有關係從前御史兼辦部務其來已久於事並無窒礙因傳爲訖曾經奏及以衙門各有專司本任或難兼顧此例遂爾中止其實御史在部兼辦該堂官或有行私舞弊情事較之不在部中者見聞確近卽行據實參奏朕必以其不憚上官深爲嘉許卽該堂官向在本部善於彌縫朕亦必秉公究理所派大員當此綱紀肅清之時亦誰敢徇官官相護之情不惜以身試法自貽伊戚耶况兼部御史卽因堂官稍存隱忍之見其他專司稽察該部之御史及不兼部務各員又豈毫無見聞甘心緘默耶近日兼部之例一停各部或於保送御史時以平日幹練司員不肯聽其離部將中材碌碌者舉出充數乃係情勢所必至則停例之舉爲有益乎我朝乾綱獨斷大權不稍下移 皇考世宗憲皇帝曾令六科歸都察院堂官管理彼時無識之徒尙有惑於臺無

長官之陋說聯名瀆奏者賴我 皇考睿斷舉行至今諸事整飭該御史復囿於積習輒以言官不涉司員職任妄自尊大欲於朕前巧售其術能乎不能明季科道頽風專務自矜標榜馴致黨援門戶牢不可破其時國事敗壞此輩實爲厲階此真可引爲前車炯戒者不可不力防其漸也嗣後各部司員有已用御史而該員於本部素稱得力者仍許該堂官奏請兼部行走陳聖時所奏不可行著傳旨申飭○甲午諭耀海任科道時年久是以厯加擢用今所辦事件甚屬糊塗難勝侍郎之任見有查詢案件著留京俟詢明再降諭旨其盛京禮部侍郎員缺著志信補授○諭軍機大臣等據阿桂奏緬匪畏懼天朝故將楊重英等至今尙留養阿瓦城且拘留蘇爾相不送阿瓦仍置之老官屯此次復遣人來呈遞書信看來賊匪料及事無底止頗有悔心且自禁止貿易以來伊

處必用之黃絲等物價增十倍見在上下莫不需此而去歲亦頗有苦於兵革之狀等語緬匪天性狡猾敢於食言拘留使人毫無畏懼之意阿桂所奏甚謬至緬地貿易與俄羅斯不同俄羅斯每年以數萬金由內地買其必需之物至若黃絲並非緬匪必需要物無關輕重乃謂藉此可以制賊之命乎且不得黃絲上下急迫之語乃緬匪故造流言殊不可信阿桂等因存草率完事之見藉此爲詞甚屬錯謬再伊等欲添兵辦理雖合機宜乃又稱明年再將賊匪情形察看一年並未提及進兵之事一味展轉枝梧不願大舉故如此搪塞具奏緬地險惡難攻朕豈不知但今年賊匪遣人送書因而停止明年豈可又不攻勦耶此際必須密行備辦務期明年進兵俟瘴氣一退卽行前進出其不備痛加勦殺緬匪拘留我所遣之人若彼處再遣人來斷無遣還之理悉行留下盡數

解京看來賊匪不將拘留人送還諒再不遣人復來著傳諭阿桂等妥協辦理明年大舉加意訪察賊匪消息如遣人再來送書或訪得一切情形卽速奏聞○乙未軍機大臣等議奏據伊犁將軍伊勒圖等奏稱兵丁民人發遣伊犁效力贖罪充當苦差者於三年期滿時能改過者滿兵駐塔爾巴哈台爲兵漢軍入綠營爲兵民人爲民分晰辦理至發遣永遠充當苦差之人果能當差出力改悔前非似應照此辦理等語查罪人准其爲兵爲民原予自新之路然須視其犯罪之輕重分別辦理若本犯重罪永遠發遣者自與效力贖罪之人有別該將軍並不分別一例懇恩釋罪爲兵爲民所奏殊屬非是請交部察議但重罪之人果知罪改過效力奮勉者亦宜酌予以自新之路請嗣後所犯重罪人內如有改過奮勉者定爲十年限期期滿該將軍大臣奏明請旨從之○是歲

朝鮮琉球來貢○會計天下民穀數各省通共大小男婦二萬一千三百六十一萬三千一百六十三名口各省通共存倉米穀三千五百七十九萬三千四百三十七石八斗一升九合四勺

東華續錄

臣王先謙

臣周馥恭校

乾隆三十六年辛卯春正月免福建臺灣府屬本年額徵粟米○
乙巳免廣東廣州韶州等府州屬本年官租十分之一廣西桂林
等七府州屬本年官租及桂平等府州學租十分之三○丁未免
四川甯遠等四府州屬建昌鎮標各營雷波等廳民番本年額糧
○辛亥命侍衛宣力有年因老病致仕者俱准戴原品翎頂著爲
例○癸丑撥部庫銀二十萬兩倉米十七萬石於直隸備賑○己
未諭彰寶著來京陛見阿爾泰見令仍回四川總督之任德福侯
阿爾泰回任後卽馳驛前往雲南暫行署理雲貴總督印務彰寶
侯德福到後卽馳驛起程○戊辰以瑪興阿爲左副都御史

由給事中

遷

二月癸酉命旌額理爲烏什辦事大臣以邁拉遜署吏部左侍郎

由內務府總管署

○甲戌

上奉

皇太后啓鑾東巡

○丙子免經過直

隸州縣本年額賦十分之三○丁丑諭今日至寶稼營登舟見所設水營外圍席牆槩行幕以黃布甚屬非是向來巡幸所經水程營盤外牆率以葦席爲之儘足以蔽內外惟江浙兩省因葦稀少代之以布卽與內布城相屬高下亦略相等今乃於葦席之外復加布製且高逾數仞儼如大牆其意何取布匹爲小民被服所需豈宜妄爲耗費卽如武清等縣去夏曾經被潦因加恩從優賑恤幸而民無菜色稍爲慰懷若留此布爲貧民襦袴之用資衣被者不知凡幾顧置有用爲無用使不知者幾擬於土木衣文繡豈朕省方觀民之意司牧之謂何曾不知體下情承上德乎前途有似

此者著卽撤去所有布匹聽民閒買用庶不致成棄物山東毘連直隸恐亦聞風效尤並著速行除撤至水營內所備坐落數椽該督之意爲朕披覽奏牘召對臣僚而設亦甚無謂且又未豫爲奏明尤屬冒昧朕自辛未南巡以來川途所莅每日辦理庶務延見臣工俱在御舟諸凡甚爲便適且並未以舟車廢事眾所共知此次允富明安之請巡幸山東所重在問民疾苦嘉惠羣黎實不欲絲毫耗及閭閻物力猶恐地方大吏踵事增華屢經諄諭一切務從儉約毋飾浮靡不啻三令五申楊廷璋何竟不知仰體朕意若此著傳旨申飭並將此通諭知之○諭各直省設立將軍副都統原爲管轄駐防兵丁無將軍副都統處則設城守尉管理城守尉雖係三品其職幾與副都統相等且又獨駐一城辦事亦在大臣之列補授後謝恩請訓例應自行奏聞至與各城協領一體於年

滿送部帶領引見亦於體制未協嗣後並著與總管一體繕摺請
旨陛見如不准來於次年再行請旨著爲例○辛巳諭大學士陳
宏謀老成端謹敷歷宣勤簡任綸扉正資倚畀前以抱恙屢次懇
請解任調理節經降旨慰留令其安心調攝無庸開缺冀春和可
待復元今據奏精神恍惚仍復如前若再因循戀職實難自安請
開缺回籍調理等語情詞肫切勉從所請著加太子太傅以原官
致仕並賜御用冠服朕親賦詩章以寵其行令伊孫刑部主事陳
蘭森隨歸侍養回籍後仍加恩按原品食俸俾得蠲疴頤養期臻
耄耋用昭優眷老臣至意○免直隸滄州等五州縣民欠借穀並
武清縣本年額賦十分之五○癸未諭軍機大臣等今日御舟過
興濟牐閱視大槩情形似宜僅用減水石壩不應更立牐座該處
河道本屬深通當春令水發之時底水猶然寬裕以朕所御安福

艫而計船身受水約三尺餘浮送尙屬便利則江廣重運糧艘儘足邁行無礙毋庸更資牐座節省常時既不藉其利而一遇運河漲盛牐口窄小難容又有金銅牆攔阻不能立時宣洩易致漫溢爲虞若拆去牐牆改爲減水石壩使河流隨時暢瀉自爲因地制宜之道且牐底見在高出河面約五六尺若俟漲滿平底方令減網其勢已遲或將舊有牐底落低數尺改爲滾壩坦坡以次漸落並將下游引河及歧口入海處所逐層疏導俾成建瓴之勢無稍壅滯則較此特長水三尺卽可隨時由壩滾消無慮積久而溢而出口水誌比今尙餘三尺並無慮重運之或致膠舟此工庶不致虛設昨楊廷璋因去夏雨水過多運河漫溢淹浸田廬而興濟以下更無減水之處議於天津城西芥園左近添設減水壩一座以洩盛漲朕昨親臨相度尙覺其地距津城太近不能經久無弊因

諭周元理詳悉勘度形勢於上流另擇妥善之地俟朕回鑾再行
閱定今思此處若果宣洩得力其上復有捷地牘或並照此一律
妥辦運河又有此兩壩減水暢利雖遇漲潦不致全注下游則楊
廷璋所議芥園壩工卽不再添似亦無礙卽如從前南巡時閱視
清口情形因定五壩過水尺寸令河臣每歲或按水誌展拆清口
以洩洪湖之漲自後下河遂無潦患頻年有收較之前人斤斤於
車運諸壩之節宣不啻事半功倍此非釜底抽薪之一明效大驗
乎但河務關係重大朕經行一覽亦未能自信爲必屬可行周元
理在直隸甚久河防事宜素所留心而楊廷璋亦當折衷以總其
成但恐伊等面承朕旨或不敢復抒己見非所以集思廣益也因
思裘曰修向日曾命閱過河工尙屬諳悉河務著前往滄州一帶
會同楊廷璋周元理將運河上下情形及引河歸宿之處逐一履

勘悉心籌度據實詳悉妥議具奏楊廷璋等尙須至山東境上送
駕表曰修奉到此旨亦不必如馳驛之迅速須按程而行約計楊
廷璋等回至滄州適與相會尙可從容妥辦不必赴山東行在復
命俟回鑾至直隸面候閱定再爲指示所有御製興濟牘及芥園
壩工二詩並著鈔寄閱看○兵部議覆兩江總督高晉奏武職官
員子弟其隨任入伍年久者向無禁止本省應試之例但伊等究
係官員子弟一經中式卽占該省武舉名額請將此項兵生無論
在營年久槩不准其應試等語應如所請嗣後不惟禁其應試並
不准其入伍食糧卽籍隸本省之遊擊都司守備其子弟入伍應
試亦俱令各歸本籍州縣從之○甲申諭前於寶稼營登舟見所
備水營外圍席牆幕以黃布又添設座落板房均爲過當楊廷璋
並未先行奏聞輒爾糜耗物力不能體朕省方問俗之本懷業已

降旨申飭布匹爲民間衣被所需豈宜妄費因卽令沿途槩行撤去而板房則成功難於遽毀姑聽仍留然每日駐蹕閱之輒爲不憚夫水營不過爲橫舟一宿而設朕所御安福艦大小合宜日常理庶務見臣工至爲便適且於岸上張設瓊廬尤極寬敞雖召對多人亦能容列從前四巡江浙及年來再莅天津規制未嘗增易朕甚安之亦眾所共知者何今次獨藉板屋數楹憩息乎且又位置廊軒增飾華美心益增厭是以所至之地竟有不登岸寓目者構此何爲雖一切裝修皆係舊存物料其工作之用則由大吏等自效惻怛然朕巡幸所經供頓儲備絲毫不欲累及官民每一水營准令開銷數千金俾之承辦寬裕今乃不知撙節轉事此無益之耗費實所不取昨已面諭楊廷璋令將所有料物於回鑾後卽速自行變售毋許再存嗣後或有安設水營悉遵舊規不得稍有

點綴致干咎戾此次著賞給鹽庫銀一萬兩以償其費並爲明白
宣諭使知朕禁奢崇實之至意○丙戌免山東經過州縣本年額
賦十分之三被災地方十分之五○免山東泰安曲阜二縣本年
地丁錢糧○戊子給山東齊河等四縣災民籽種牛具○己丑諭
軍機大臣等據阿桂奏稱緬匪狡猾已極應於今年大舉進剿請
入覲請訓俾得詳悉面奏一切等語阿桂殊屬可惡又以狡計嘗
試朕矣朕因賊匪地方路險瘴深原不宜於內地之人故從前令
於每年秋後瘴消時帶兵進剿止圖爲困賊之計俟有可乘機會
卽當一舉成功耳此等處阿桂豈竟不知乃以本年大舉爲請其
意何居如傅恆從前辦事俱秉天良進兵亦能奮勇前歲遣伊征
剿緬匪其所帶之兵俱係勁旅尙不能一舉蕩平止以其人篤誠
自矢猶得招降猛拱猛養等處至老官屯環圍取勝阿桂豈能追

蹤耶卽伊見在奏派之兵未盡精銳且復毫無忠忱卽欲大舉朕亦焉肯委任若謂另有良策有何不可具奏之處卽云摺奏難悉彰寶見在進京又何不可告伊代奏顯係思家念切奏請來京其心尙可問乎再侍衛等彼處俱應備用今遣回又屬何意種種令人不解著傳旨申飭並令明白回奏伊誠有大舉良策卽令告知彰寶轉奏並將此時賊匪情形一併奏聞○庚寅免山東濟南各屬民欠借穀及東平州東平所逋賦○辛卯免山東濟南等六府屬民欠麥本銀兩○命伍岱爲參贊大臣赴雲南軍營○命劉綸爲文淵閣大學士兼工部尙書以于敏中協辦大學士調程景伊爲吏部尙書范時綬爲刑部尙書以裘曰修爲工部尙書

由工部左侍郎

○壬辰以閩循琦爲工部左侍郎

由內閣侍讀學士遷

○甲午軍機大臣

等議覆都統管理健銳營努三等奏健銳營三千兵內僅有一百

養育兵缺應請酌增等語查京城八旗滿洲蒙古漢軍共兵六萬三千九百餘名養育兵共二萬五千一百缺覈計每三名內給一養育兵缺圓明園兵三千九百二十餘名養育兵共四百八十缺覈計七八名內給一養育兵缺今健銳營三千兵內養育兵共一百缺覈計三十名內始有一缺固應議增卽圓明園兵內均每兵四名定一養育兵缺其火器營亦應倣照辦理惟健銳營圓明園餉銀二兩之缺改爲餉銀一兩五錢尙可餘養育兵餉銀八千一百九十餘缺請暫存留俟八旗餘丁滋生浩繁再行酌量均分得旨此項餘缺不必存留竟按三兵給一養育兵缺餘依議又諭軍機大臣等議覆努三請添設養育兵一事將八旗圓明園健銳營火器營養育兵之缺一體按四兵一缺覈計定擬具奏朕思養育之設原爲養贍糧單口眾並鰥寡孤獨無依之人若照軍機大臣

議行缺尙較少於伊等生計不無拮据殊非朕體恤旗人至意朕撫御天下凡兵民皆仰賴朕恩宜隨時調劑令伊等生計寬裕卽如各省偶遇偏災俱降旨將應納錢糧蠲免又不惜數百萬帑金動撥賑濟今八旗生齒日繁自宜施恩酌增錢糧以裕生計其應添養育兵額缺著按三兵一缺辦理止儘糧單口眾者挑補其鰥寡孤獨不必分占此缺朕格外施恩著由部庫撥帑每人按月賞銀一兩五錢以資養贍此內孤子至十二歲卽令調補養育兵其遺缺仍於四項人內挑補如是定例辦理使八旗人等均霑朕恩永遠裨益卽每年多需數萬帑金亦不惜也將此交八旗都統大臣等務體朕意妥協辦理俾伊等均霑實惠著通行曉諭知之○乙未調姚成烈爲廣東布政使閔鶚元爲江甯布政使○丙申

上奉 皇太后謁 岱嶽廟 上登泰山○己亥諭軍機大臣等

昨據尹繼善等將審訊賽哈賴謀毒格格致死使女寨罕寨一案情形具奏尙未明確卽如究出喇嘛巴爾丹格隆與賽哈賴有姦給與毒藥一節卽係索琳等在彼曾經詢及之事此等糊塗喇嘛導之使言安知其非信口妄供豈遂可爲此案的實證據至賽哈賴平素與格格有何仇嫌何至設計下毒自必有主使之人如果根究得實毫無疑義則將賽哈賴處以寸磔自不爲枉若竟出自納遜特古斯之意卽並加以重罪亦所自取若因關礙格格惟向一面推求執喇嘛給藥之言妄加鍛鍊則又何求不得人命至重豈可使案情介於疑似遽處以極刑乎朕意此案疑竇甚多其關鍵似不在此昨啓鑒前曾向尹繼善劉統勳詳悉面諭何不遵旨細加詰訊耶如所稱見在使女惟桂格一人係莊頭之女性極愚蠢爲格格所不喜而見所親信之一二人俱係蒙古使女等語殊

未明晰此案所最喫緊處乃當時中壽未死之使女四人或全係蒙古或有內地之人一爲訊明卽可得其中要領而彼時給使女同喫或卽當賽哈賴賞給或俟其退出後再給尤爲扼要情節何舍此不問轉就見在使女而言乎且格格乃親王之女媵婢當必不少豈無可親信伏侍之人何至轉用蒙古女子卽據弘旰所云當時媵婢原有六人後退回兩人復又如數換往其年長者已在彼婚配卽不許進內服役等語其理亦不可解媵婢既有六人且又經更換何至皆不堪使令僅存一麤蠢之桂格格况格格與納遜特古斯不睦何轉擇彼處使女加之親信而媵婢一經婚配卽不令進內納遜特古斯有何威令竟能嚴切若此其情節卽多滲漏皆所當逐一訊及者前曾諭尹繼善等如格格有應行質問之處不妨面詢卽傳言往問亦當選明白章京前往今摺內並無一語

提及豈有所顧忌尙未辦至此乎至於納遜特古斯平日別有曖昧私情格格嫉妬不容遂爾參商自屬情理所有卽格格平日不能孝敬納遜特古斯之母因而憎惡亦難保其必無然亦何必竟欲致之於死卽或因格格今年例應進京納遜特古斯等懼其洩漏彼閒情事殺以滅口設其計果行甯不慮格格身死不明爲王府所詰責乎至土默特貝子哈穆噶巴雅斯瑚朗圖業因索琳等在彼查審事件驚懼病亡茲將此案人犯解京質訊致其家不能與之持服若再不加意精詳始終難成信讞輒將彼地之人抵以重辟更復成何事體格格爲天潢近支如果訊無別情朕豈肯過加責備若謀毒案情果實亦豈肯偏向納遜特古斯等曲示保全朕辦理庶務一秉大公至正雖匹夫匹婦亦不使稍有冤抑况關係格格及額駙乎著傳諭尹繼善等遵朕此旨備細研訊務得確

情卽行據實具奏○庚子賜山東召試諸生初彭齡等二人舉人
○諭軍機大臣等尹繼善等查審土默特一案前日所奏情形未
爲明晰昨已將案內應行查訊緊要關鍵詳細傳諭今據尹繼善
等奏訊出納遜特古斯令喇嘛巴爾丹格隆配合毒藥謀毒格格
各情節其事實屬大奇已於摺內詳加批示矣納遜特古斯何以
必欲謀毒格格其故殊不可解若止因夫婦不睦則其分居已經
數載納遜特古斯縱有私情苟且之事惟所欲爲格格原未能禁
阻何至勢不兩立必不相容設云畏格格今年例應進京恐洩其
事納遜特古斯又有何事慮其洩漏若不過因與格格參商則誠
親王家早已備知初無待格格之面訴卽格格向誠親王盡情告
述誠親王又如納遜特古斯何若云納遜特古斯實有懼格格告
訐之事除是謀爲不軌否則何至殺以滅口而土默特乃內扎薩

克伊父子受國家厚恩朕視之不啻如子孫伊等有何怨望而忽懷異志且朕何如主今何如時眾扎薩克皆懷德畏威亦豈肯容其略萌逆蹟無論納遜特古斯斷無此心卽欲作不靖能乎不能此固可信其必無其餘更無從揣其甘心謀殺格格之故且納遜特古斯豈不計及格格與彼雖不相和好留之豈能爲害若將格格致死甯不慮太監等之告發罪且安逃納遜特古斯雖愚當不至是尹繼善等亦曾平心請求及此否據見在所取之供其中卽多疑竇巴爾丹格隆旣供毒藥係伊配合必當究其係何藥味今尙有無存留非根究明確實有證據不足以成信讞至所稱諸婢女中毒後令巴爾丹格隆診視伊如果與謀何妨佯爲不知或託言他病以掩其罪蹟豈肯轉向問有人送飲食與否且爲之用藥解毒乎此又情理之不可曉者若此等皆不加詳慎遽爾顛預定

案何以服其心如果訊有實據眾供僉同不但賽哈賴罪應寸磔卽納遜特古斯敢於忍心謀害格格罪亦應死設或案情不真羅織成獄令賽哈賴等皆以冤死而土默特一部落竟至家破人亡則將來扎薩克子弟尙敢復娶諸王之格格乎看來此事必係索琳等在彼誤認兇謀要犯妄加疑訊此時意存迴護遂仍照原審情節招尋而軍機大臣等又無能持正之人任其遷就取供急圖了事觀賽哈賴之委頓難堪則索琳等前此之曾經鍛鍊可知矣試令索琳自思如果當日確見賽哈賴爲此案正犯則納遜特古斯乃應行質訊之人何不卽在彼逐層根究轉將要犯交付竟爾回京甯不慮其串供狡賴乎今已諭令索琳馳驛前來行在尹繼善等務宜虛公研訊毋得稍存成見致失平允從前面諭應行訊問格格等之處實爲緊要關鍵尹繼善等曾否問及何以兩次摺

內不是一辭豈竟信見在之供爲可據以定案遂將格格一層付之不問乎格格爲誠親王之女朕豈肯過爲苛求轉偏向納遜特古斯之理但事期覈實獄貴持平朕辦理庶務一秉大公此案斷不能聽其草率完結如前諭所指懇問格格各條訊明果無疑義卽詢明用毒情節於格格處實有關涉亦當究其藥從何來如何下藥眾證確鑿方足爲據又豈可使之稍有枉抑乎但降此旨時並召見色布騰巴勒珠爾扎拉豐阿據奏聞得納遜特古斯去歲曾將伊親兄吹扎布下毒幾死經喇嘛醫治至今未愈眾所共知朕從來不存成見此語出伊兩人之口又當不虛納遜特古斯於其親兄尙且不顧何有於格格其事又難保其必無矣卽吹扎布一節亦當一併訊明卽可爲此案印證納遜特古斯自更無從抵飾朕亦非必欲故爲開脫將此傳諭尹繼善等總之無冤人無曲

法可也○是月欽差尙書裘曰修等奏查青縣滄州兩處減河之設原因洩運河盛漲非同牐座啓閉兼以蓄水且見今牐座皆高出河面數尺水淺既不藉牐版之節蓄水發則惟賴減河之暢流况牐口原不甚寬每口又有雞心牆間隔轉使水勢不免壅滯誠宜用滾水石壩不應更立牐座其滄州捷地原牐形勢兜灣改壩應近河邊裁曲就直以順水性至減河因節年過水受淤俱有壅塞必須測量高下節節疏通使其順流達海見由捷地勘至入海歸宿之處復折回勘至青縣之興濟將應挑濬事宜悉心妥議候回鑾指示遵行得旨是知道了

三月壬寅朔增山東本年學額○吏部議奏戶部侍郎索琳審理上默特一案錯謬旋回奏自請嚴議應降三級調用署刑部侍郎博清額隨辦錯誤應降二級留任從之○癸卯以桂林爲戶部右

侍郎德文爲山西按察使

由甘肅道遷

○命降調戶部右侍郎索琳

署內閣學士在軍機司員上行走○甲辰諭軍機大臣等前因查審土默特一案降旨時並召見色布騰巴勒珠爾扎拉豐阿原以事涉蒙古使伊等知朕辦事一秉大公不肯因誠親王之女稍有偏向致蒙古人或受屈抑此朕本意也乃伊二人同奏稱聞得納遜特古斯去歲有謀毒伊親兄吹扎布之事此語出自伊等之口當自不妄伊等同係蒙古又素無嫌怨豈肯造言傾陷可見天道昭彰此等虧心害理之事斷無不敗露者納遜特古斯忍於毒害其兄何況格格從前朕尙恐承審大臣等未免因關礙格格專就賽哈賴一邊有心鍛鍊是以屢降諭旨務令持平今既有此情節則納遜特古斯之陰險兇殘實無可疑矣但謀毒吹扎布一事其情罪較謀毒格格更重自應嚴訊得實前據究出賽哈賴毒藥得

自巴爾丹格隆而濟蘭泰亦屬與謀則納遜特古斯謀毒其兄斷無不與此兩人同謀之理可卽就此兩犯嚴加鞫訊自必底裏盡露迫眾供確鑿一經質訊卽納遜特古斯諒難復爲支飾其案可以立定則謀毒格格一案更可片言而折矣至將來結案自當以謀毒吹扎布一節定罪卽如內地案犯弟謀殺胞兄已行者律當凌遲而夫謀殺妻雖已行止於絞監候若兩案並犯從重歸結今納遜特古斯設計謀毒其兄圖襲伊父之爵其情甚爲可惡以此定其罪案辦理時更覺名正言順而爲扎薩克除此逆倫敗類卽眾蒙古聞之納遜特古斯獲罪並不由格格更當心服賽哈賴謀毒其主亦自律有明條將此諭令尹繼善等卽行審明按律定擬具奏○乙巳 上至曲阜展謁 先師孔子廟○丙午 上釋奠

先師孔子○丁未

上謁

孔林○祭

少昊陵

元聖周公

廟○賜衍聖公孔昭煥合族銀幣有差○諭前歲修葺太學告成
因念闕里 廟堂設有犧象諸尊爰擇舊藏周范銅鼎尊等十事
陳之 大成殿用備禮器茲臨幸曲阜祇謁 先師閱視所列各
器不過漢時所造且色澤亦不能甚古惟茲昌平 聖里宜陳法
物以爲觀美著倣太學之例頒內府所藏姬朝銅器十事備列
廟庭用愜從周素願俟朕回鑾後慎選郵發交與衍聖公孔昭煥
世守勿替以副朕則古稱先至意○戊申 上奉 皇太后回鑾
○辛亥秦鏐緣事降調以劉秉愉爲湖北按察使由湖南糧道遷○癸丑
諭軍機大臣等據尹繼謨等奏審訊納遜特古斯已將謀毒伊兄
吹扎布情節供認不諱業於摺內批示矣既經訊明俟吹扎布來
京一爲質證卽可定案見在可無庸再爲研鞫致伊轉生疑懼止
須嚴密防範毋令稍有疏虞至將來定擬納遜特古斯罪名摺內

並應敘明謀毒格格一節不過夫謀妻律絞候今伊謀毒親兄忍
心害理實爲罪大惡極自應從重擬以凌遲雖律載謀殺期親尊
長已行者斬已殺者凌遲處死但律設大法而緣情定罪貴有權
衡如納遜特古斯之謀毒格格卽令侍女分食中毒而死是其計
行而格格並未入口尙可謂之已行而未殺至謀毒伊兄吹扎布
業令飲藥得病吹扎布幸而醫治不死而納遜特古斯必欲致死
其兄之兇謀已遂卽與已殺無異正不得拘泥律文曲爲輕貸著
傳諭尹繼善等定案時將納遜特古斯照凌遲律定擬並將伊謀
殺親兄情眞罪當並不山謀毒格格之故明晰聲敘候朕另降諭
旨俾眾蒙古聞之知朕辦理此案一秉大公至正而蔑倫兇惡之
徒罪由自取當益感恩畏法將此諭令知之此數日閒得雨否若
得雨速奏來○乙卯盛京兵部侍郎富德內閣學士陸宗楷以年

老休致○召金祖靜來京以蔡應彪為貴州按察使○戊午諭去歲福建巡撫鍾音查奏楊開鼎捏報小修戰船一案朕以該督崔應階僅令賠補了事不卽據實參奏知其年力就衰未能振作難以復膺封疆之寄因令崔應階來京陛見調為漕運總督至閩浙總督員缺鍾音未嘗不可勝任但案由鍾音舉發若巡撫劾一總督卽以其缺授之恐開覬覦傾軋之漸是以止令鍾音暫署彼時原欲用富明安為總督又因其今春有應辦東巡事務今由水程回鑒明日卽出山東境伊並無經手未完之事富明安著補授閩浙總督卽赴新任其山東巡撫員缺著周元理補授所遺直隸布政使員缺著楊景素調補甘肅布政使員缺著尹嘉銓調補山東布政使員缺著海成補授所遺安徽按察使員缺著圖思德補授○以福德為盛京兵部侍郎降博清額為內閣學士以瑪興阿署

刑部侍郎

由左副都御史署

○庚申免甘肅通省民欠籽種口糧倉穀○

壬戌以圖桑阿爲甘肅按察使

由陝西驛鹽道遷

○癸亥吏部議奏署雲

貴總督彰寶前任貴州巡撫宮兆麟喀甯阿布政使觀音保按察使金祖靜等於署威甯州知州高瑋等短缺鉛斤米石及短發工本等款不行查揭應照例降革得旨依議宮兆麟著革任彰寶著降一級留任金祖靜著降三級用○甲子 上至捷地閱隄定捷地興濟二牐爲減水壩罷芥園減水壩工○乙丑諭去年十二月誠親王具奏額駙納遜特古斯之子乳母於送和碩格格食物內置毒格格未食致使女誤食身死懇請查辦朕以此事甚屬荒唐可疑然不可不究特派羅卜藏錫喇布索琳博清額等面降諭旨令前往土默特秉公審辦斷不可以王女意存偏徇用藥毒人乃奸民伎倆蒙古風俗醇樸決不出此或係格格誣賴亦未可定爾

等到彼不可屈枉於人務得實情具奏旋據索琳等奏稱使女委
係中毆身死提一應干連人犯逐加嚴審眾供僉同朕卽降旨以
索琳等辦理此事並未審出確證惟拘泥誠親王原奏將納遜特
古斯之子乳母賽哈賴嚴加究審遽以爲實甚屬非是因降旨令
索琳等將案內人犯並納遜特古斯一併解送來京交軍機大臣
會同刑部審辦並令將格格一同護送前來仍將索琳等交部議
處但此事愈想愈覺可疑納遜特古斯於格格何至懷仇有用藥
毒害之事其中不免另有別情屢經降旨承審大臣如有應問格
格之言不妨當面詰問必須審辨詳明使外藩不至屈抑後據承
審大臣陳奏審出大槩情形仍係照索琳等將賽哈賴審訊具奏
朕猶以爲斷乎不可如果賽哈賴置毒是實卽將賽哈賴凌遲處
死亦非屈枉卽納遜特古斯亦有應得之罪但此案罪名甚重關

繫多命若惟嚴刑窮鞠何求不得必須詳之又詳訊出證據定罪方無冤抑復經降旨訓示尋據尹繼善奏稱此事審係納遜特古斯令喇嘛巴爾丹格隆配毒將格格謀害此事令人愈不可解納遜特古斯何故必欲謀害格格縱伊夫婦不和亦何至用此毒計若謂今年係格格進京之年恐其愬知於王亦不應謀害如此之甚即使愬知於王伊等夫婦不睦非大關緊要之事王亦何能過問如有致死格格之事卽非用藥毒害彼處太監等豈肯緘默自必告發治罪伊雖至愚諒無不知此案疑竇甚多若卽據此定罪嗣後扎薩克子弟皆不敢尙娶王女矣因召見軍機大臣並色布騰巴勒珠爾扎拉豐阿等據色布騰巴勒珠爾扎拉豐阿奏稱去年納遜特古斯曾用藥毒害伊兄吹扎布垂危急救得生至今尙未痊愈此事眾所共知朕以既有此奏因傳諭尹繼善令吹扎布

來京歸案質審茲據尹繼善奏稱吹扎布供伊弟納遜特古斯謀害是實訊之納遜特古斯亦皆供認質之各犯矢口不移納遜特古斯謀襲伊父貝子毒害親兄實屬罪大惡極雖未致死已與業經殺害者無異是用藥謀毒格格之罪尙輕請照謀殺期服尊長律凌遲處死等語據尹繼善此奏看來納遜特古斯謀害伊兄誠爲怪事蒙古向來稟性醇樸惟知念經敬佛禱祝之外從無此等兇險惡習是以朕於審訊納遜特古斯之時屢經降旨指示今承審大臣審訊謀毒伊兄之事甚明據稱納遜特古斯謀害伊兄成疾羅布藏錫喇布曾爲請假送回游牧至納遜特古斯必欲謀害伊兄者不但謀襲父爵並因以每逢進京吹扎布因其不肖屢加管教回至游牧將伊貪酒聽曲之事稟知伊父將伊責處因此懷恨用毒謀害似此喪心蔑倫實堪痛恨不但於法斷難寬宥亦爲

天理人心所不容卽眾蒙古亦爲納遜特古斯所玷辱矣理應卽將納遜特古斯凌遲處死但念係年幼愚昧所致是以施恩免其凌遲改爲斬決其用藥謀毒格格之濟蘭泰賽哈賴巴爾丹格隆俱照律凌遲處死將此通行曉諭眾蒙古等嗣後各教訓子弟遵循蒙古醇樸舊俗敬佛念經奮勉當差痛改惡習以承朕恩眷○己巳諭昨阿桂忽奏請今年大舉征剿緬匪因降旨嚴飭並令明白回奏今阿桂奏到頓改前言謂伊前此奏請大舉之說並非於本年卽辦欲及早將糧石等項從容籌備以期諸事就緒復將伊意所見及臚列清單具奏阿桂此奏又屬取巧緬匪性極詭詐知我兵大進斷難取利是以有意激我使我耗費兵力轉於彼有益朕早已洞燭其奸若彼無覺可乘斷不可輕議大舉屢降諭旨甚明然彼旣食言則相時勦襲使賊匪不得安息以疲其力亦不可

少也阿桂果有礙難辦理之處卽將實在情形聲明具奏亦無不可乃前此惟以今年大舉進剿爲詞稱請來京有面奏事件請訓後回至軍營尙不誤進兵之期今又變其前說謂並非今年卽欲大進而摺內所列六條亦不過尋常籌辦事宜並非機密要務不便形之奏章不可告之彰寶必須前席面陳者其意何居總之阿桂辦理此事始終茫無主見又思家念切故以前說妄行瀆奏經朕鑒察其隱降旨詰責伊無詞可對始如此巧爲文飾則其思家畏事之心不啻肺肝如揭矣如阿桂摺內所請籌備馬騾一節共需馬騾三萬四千餘請交河南山西陝西甘肅四川貴州廣西等省分辦等語四川貴州廣西等省產馬本屬無多數年用兵以來購辦已爲竭蹶若此時復令辦解實有所難卽如李侍堯見至行在陛見試問伊粵西省辦馬二千匹能乎不能則四川貴州等省

之辦理不易更可想見又前歲進兵時經過地方絲毫不使累及閭閻並爲加恩賞賚惟期民共安恬而馬騾必待齒力長成方堪適用若本非產馬之地素鮮蕃孳安能咄嗟而辦阿桂豈見不及此而故爲此必不能行之說非空言塞責而何至於辦理緬匪一事朕初非好大喜功必欲窮兵荒遠前因其騷擾近邊土司不可不加懲創而賊匪公然抗我頗行自難曲宥然猶待以一年仍不知悔罪輸誠實有不得不辦之勢始大集兵力進剿迨大軍攻圍老官屯無如水土惡劣官兵多有損傷卽傳旨撤兵休息適賊酋又遣人至軍營呈願投降納款遂允其所請赦罪班師乃緬酋狡黠爲心旋卽反悔竟不進表及歸我擄人該總督移檄責催反敢將差往之都司蘇爾相拘留賊寨是緬酋深知我兵限於天時地利激我再舉彼得坐乘便利設或墮其術中徒然勞費無益於事

此理實爲易曉故屢飭阿桂等不宜輕舉第賊匪反覆無常敢以
謁謀激我因令阿桂等於秋冬閒酌量情形以偏師擾其邊界俾
賊疲於奔命以待機有可乘乃阿桂並不遵旨熟籌轉奏請復圖
大舉試思老官屯撤兵甫閱年餘今若復議進剿非惟適中賊計
亦且師出無名若爲拘留蘇爾相起見彼不過一總督差官又何
值興師動衆乎阿桂妄爲此奏朕固知其非出於誠心特因降旨
詰責姑撫拾浮詞圖掩前言之失耳如摺內所稱辦理糧石等項
及今豫備一二年內可期就緒等語尤屬謬誕滇南徑險山多糧
餉艱於輓運且甫辦軍需以後何能卽時儲備充盈亦猶馬匹之
不能驟長供用若如阿桂所奏需兵四萬餘糧馬各若干萬斷非
一二年內所能如數籌備極速亦須以十年計而此十年之閒內
地且日以爲用兵不息豈有爲此么膺小醜爲此無益之理乎且

就見在情形而論不宜大舉進剿天下無不共知獨阿桂創爲此說卽令雲貴兵民間之有不竊笑而痛恨者乎阿桂在滇已經數載彼處情事皆所深悉乃將斷不可行之事故欲爲其所難豈其本心果若是乎阿桂實乃喪盡天良不堪極矣伊如因思家念切不能自制何妨據實懇求朕或令其來京亦未可定似此任意取巧飾詞具奏朕何如主豈容其施此等伎倆乎阿桂辦理此事始終不肯稍效悃忱實力籌畫惟知逞其小智巧飾妄奏實不足齒於人類阿桂著交部嚴加議處仍令其明白回奏並將此旨及阿桂摺單令行在大臣等閱看仍譯漢通諭中外知之○盛京工部侍郎耀海以不勝任開缺以三品小京堂補用

夏四月癸酉命各衙門堂官司員每日辰時入署辦事不得遲緩○甲戌命戶部侍郎桂林軍機處行走○乙亥諭前諭各省督撫

將州縣升授京職人員填註切實考語送部另班引見原欲爲外省多留熟練之員期於吏治有益今日引見月官內有籤升中書之山西省卓異知縣王巨源該撫鄧寶所出考語不過尋常品評業降旨依擬用第思此例行之日久恐不免有流弊雖人才優劣不能逃朕洞鑒固無慮註考之獎許失真但人情喜外任而不樂京職大抵皆然督撫或因其久隸下僚託留熟手爲名心存遷就而不肖屬員或並因此啓夤緣倖進之風亦不可不防其漸卽以辦事而論州縣雖有刑名錢穀之責然案牘悉由自理難保其必無高下任情自不及部院衙門之事有準繩集眾思而成公是且外官每耽安逸亦不若司員之終日服勤誠令伊等在京供職數年留心學習再行簡擢外用未嘗不更可造就成材昨曾諭吏部將見任京員中由卓異等項內升者查明帶領引見並予甄錄記

名備用自無慮其終滯曹司亦可無庸豫爲別擇所有月選內升人員督撫出具考語送部之例可不必行嗣後吏部將此項人員每三年查辦一次列名帶領引見候朕酌量錄用著爲令○丁丑上奉 皇太后還京師○戊寅諭前據范宜賓奏各省藩臬陳

奏事件不應先行呈送督撫閱看一摺曾諭令各該督撫明白回奏今據先後奏到十餘處大率稱督撫藩臬於奏報收成晴雨等事恐其錯誤往往互相質證至條奏地方公事兩司亦有稟商督撫者若不呈閱亦不向其索看等語朕殊不以爲然向來藩臬條陳不過各就該省之錢穀刑名事件摭拾敷衍朕或批交督撫議覆或批令告之督撫酌量可行則行是地方公務原不妨彼此商榷其事轉無甚闕礙至收成晴雨等事令藩臬亦得專摺奏聞者誠以水旱豐歉情形事關民隱冀得互相參覈不致粉飾欺蒙以

收兼聽並觀之益若彼此商同入告依樣葫蘆無裨覈實則督撫一奏足矣安用是重見疊出者爲耶至若督撫果有不公不法之事藩臬聞見旣真原應據實入告然朕並不以此責之兩司俾得鈐制上官致開告密之漸而兩司亦從未有劾奏督撫者卽如近年以來良卿方世儒等枉法營私爲天道所不容惡蹟自然敗露各正刑誅而該省藩臬初何嘗於朕前奏及一語則大吏之自取重戾又豈必待兩司之舉發乎且督撫旣膺委任豈轉不及藩臬之足信朕亦不肯過爲逆億若使藩臬中實有廉正可信逾於督撫者亦卽以督撫任之又何肯不加擢用轉令其隱爲糾伺乎總之整飭吏治之大要恃朝廷綱紀肅清自不敢有扶同蒙蔽之事初不在乎設法峻防若燭照稍有不周則雖檢制加嚴適以滋弊此爲君之難也卽如近日范宜賓與胡文伯意見抵牾朕因高晉

奏知留心察覈初未有所偏向及見胡文伯在任辦事種種未協難以復膺封疆重寄因子罷斥並非由范宜賓之劾奏而范宜賓查奏捕蝗不力一事彼亦同干吏議又何嘗因其不畏巡撫特爲獎賞乎朕辦理庶務惟崇實政不欲斤斤乎禁令之具文呈閱摺橐一節督撫與聞及不與聞皆無關事理輕重如兩司慎密自矢固屬分所宜然設欲借此爲諂事逢迎亦彼自甘庸下總不能逃朕之洞鑒前此督撫等覆奏之初曾交軍機處臬齊再奏定奪今奏到者已及大半想續奏者亦不過如此毋庸俟奏齊再爲定議卽以此明降諭旨通諭中外知之○己卯諭福德留京仍以內閣學士在軍機司員上行走所有盛京兵部侍郎員缺著伯興補授○庚辰命山東購麥運京備糴○辛巳諭京察滿洲翰詹各員兼部行走列在一等者卽入部員數內比較其原衙門另班聲敘之

例不必行又各部院到任未滿半年之員所有原衙門註考之例
永行停止至各衙門人員在緝書房行走保送一等者准其自爲
一項吏部帶領引見並著爲令○癸未諭軍機大臣等前據崔應
階奏臺灣地方半係粵莊俱廣東民人居住若地方官亦係粵人
恐不無瞻徇同鄉卽或遇事秉公又易生嫌怨滋事辦理頗爲掣
肘請嗣後廣東人任臺灣文員者槩令迴避一招彼時以其爲調
劑官民起見似亦防微杜漸之道是以批交該部議覆准行今金
門鎮總兵龔宣來京陛見召對之次詢以臺灣地方情形據稱前
歲冬閩粵莊民仇殺一案曾經派委文武員弁內籍隸閩粵省分
者曉示伊等以同鄉相信易於聽從旋即解散况見在臺郡武職
閩籍並不迴避而文職則槩屏粵人設遇兩莊間有構爭之事若
專令閩籍武弁往諭粵莊未必不疑其偏向恐不足服其心於海

外情形轉屬無益等語所奏似屬有理臺地間粵錯居易生仇讐若不過私相聚鬪豈能盡以官法繩之又不便聽其積嫌滋事是員弁等之隨宜調劑亦不可少而佐雜兼用粵人頗覺相宜況閩人任臺地武職之例並未改更獨於粵籍文員申以例禁事理亦未平允卽或因縣令職司民牧儻於寄居粵戶瞻徇鄉情公事不無掣肘尙可云杜漸防微若佐雜微員本非親民之官旣無慮其迹涉嫌疑且可資以消弭釁鬪若慎選粵籍中之明幹者遷調數人任隸臺郡於地方公務實有益而無損崔應階前奏乃不拘大小文員槩令迴避未免因噎廢食所謂知其一而不知其又有一也著傳諭鍾音將此例另行詳悉妥議具奏尋奏臺灣惟廣東惠潮二府嘉應一州三屬人居住爲多嗣後知縣惟惠潮嘉三屬人員不與選調其餘文職均照武職不避閩人之例通行選調從之

○定武職捕蝗不力處分○乙酉以旱命刑部清理庶獄減軍流
以下罪直隸亦如之○丙戌 上詣 黑龍潭祈雨○丁亥諭昨
降旨令滿洲翰詹各員兼部行走者京察時入於各該部司員內
一體考察固以防浮濫之漸亦因滿洲翰林多有由各部院升授
者向既未工文墨在本衙門轉無可見長而在部中留心辦事頗
爲有益但既已兼部則平日之勤惰優劣該堂官皆所深知較掌
院等更爲親切視其見在供職而殿最之自屬覈實之道至太常
寺鴻臚寺讀祝鳴贊等官其職專於宣贊自以儀嫻聲亮者爲優
閒有升各部院衙門者仍兼本寺行走遇典禮執事如常並不藉
其專心部務與翰林兼部者不同是其考察又當責之本寺堂官
而不必歸於部院矣乃向來京察太常鴻臚寺官升任部院者皆
由所升之缺注考而本寺卽置之不問所列一等率取其次者濫

充既非所以示平允亦不足以昭勸勵卽如前日引見鴻臚寺京察人員該寺因永信已升刑部而以烏林太爲一等夫永信在刑部不過旅進旅退卽二等尙屬過分而在鴻臚傳贊實爲傑出之員迥非烏林太所能及因將二人等第更置今日太常寺之德明扎勒漢亦然若仍拘泥成例於造就人才之道無益嗣後讀祝鳴贊等官升任後仍兼本寺行走者俱由該寺堂官注考保送著爲令○諭本日引見京察各員內翰林院庶吉士亦有列入一等者該員尙未散館授職不應遽膺薦剡著撤去嗣後庶吉士保送一等之例著停止○庚寅以王杰爲內閣學士由少詹事遷李瀚爲江西布政使由山東兗沂曹道遷○壬辰諭大學士尹繼善學識優通老成端謹歷封疆者三十餘載綏輯協宜洎入贊綸扉兼直禁近恪勤奉職倚畀方殷今春東巡啓蹕前見其精力就衰時嬰微疾令留京安

擬冀得速痊每於閣章郵便詢悉病勢漸增特派御醫診視論其服藥調理以起沈疴並令在家靜養不必力疾趨覲同鑒後時遣侍衛存問知其日漸委頓廬念有加今聞溘逝深爲軫悼著加贈太保入祀賢良祠賞給內帑銀五千兩辦理喪務並派皇八子前往奠醑所有應得卹典仍著該部察例具奏尋賜祭葬諡文端○癸巳御史張霽奏近科新進士於朔考詩題有賦二首及四首不等者請飭禁止遵定式止賦一首此外如庶常散館翰林大考以及考試試差均不得違例多作得旨嘉獎如議行○甲午諭前因殿試對策貢士等多用頌聯甚非先資拜獻之道屢經降旨飭禁今日讀卷諸臣將擬定十卷進呈閱其文詞仍未免頌多規少其間且有語涉瑞應者朕意深爲不取夫文章華實不同卽關繫士習淳漓之辨貢士等進身伊始若徒擗摺膚辭習爲諛頌豈敦尙

實學本意見就各卷中擇其立言稍知體段不至過事鋪張者按
列前茅其措詞近浮及引用字句失當之卷酌量抑置以昭激勸
並將此旨通行曉諭知之○乙未賜黃軒等一百六十一人進士
及第出身有差○丁酉諭向來各衙門派往新疆辦事人員三年
期滿由該處大臣出具考語保送引見以應升之缺卽用原所以
示鼓勵但新疆自底定以來久隸版圖與內地郡縣無異且各給
與養廉而新疆事務又極清簡該司員等出差三年不過循分奉
公與在京各衙門辦事亦無差別乃因期滿遽行保奏該管大臣
率以與例相符不復問其才具短長輒注上考是該員等一經派
出卽可借此計日超遷轉足開蹤等者升除捷徑殊非覈實課績
之道嗣後新疆辦事人員期滿時止令該處大臣給咨送部引見
其閒果有出色之員朕自當隨時量加擢用若照常供職者槩令

仍同本衙門辦事照伊等原官補用於事理方爲允協所有該管大臣出具考語保奏卽升之例著停止○命五城開廠平糶○戊戌吏部議覆御史邵庾曾奏稱內閣中書分撰文辦事兩銜遇中書典籍缺出由辦事中書題管向無撰文中書題管之例應一體選補司經局正字無專辦事件向例內閣中書兼銜請裁應如所請至以部寺司務原係從九品請改爲正七品查司務由國子監學正學錄典簿典籍等官升選由正從八品升九品未爲允協但以從九品改爲正七品未免懸殊今擬照八品筆帖式升主事之例改爲正八品從之

五月辛丑朔諭前據高晉查審知府李枝昌一案內有墊用前任巡撫明山修理書房銀兩之事因令該督撫秉公確查並令明山明白回奏旋據明山覆奏彼時因書房窄狹拆去截板所費不過

十餘金俱係隨時發價而所需工匠不得不令首縣代雇因自請
交部議處朕以明山所奏如果屬實尙不致有干吏議而其事旣
係首縣承辦無難徹底根查因交高晉一併查明具奏今據高晉
奏查明山於廣東調任江西時卽先行札飭中軍轉諭南新兩縣
修改衙署所費約五百餘金見有印封原札可據呈覽與伊回奏
所稱無涉等語實出情理之外明山不應如此督撫到任修理衙
署令首縣代辦亦事所常有但不當以此累及屬員卽或發價稍
遲其罪亦小乃經朕傳旨詢問並不據實直陳輒敢託詞捏覆希
冀蒙混封疆大臣爲朕所倚任顧可心存欺隱乎且小事如此則
何事不可爲大事尙足信乎明山著交部嚴加議處又諭明山見
在交部嚴加議處伊係革職留任之員部議自應革任向來督撫
等遇此等處分或事屬公過或情尙可原每以人材難得多有酌

量加恩仍予留任者如高晉一人所帶革任註冊之案甚多而其年來辦事公誠可信實爲督撫中傑出之人因得屢邀恩免卽如伊查奏此案並不絲毫瞻徇情面據實直陳而於查審裴宗灝冒銷運腳一案亦將巡撫裴宗錫並無徇庇同宗之處剖晰明確深得大臣秉正不阿之道凡爲督撫者不當如是乎今明山於覆奏修理衙署一事敢於欺飾蒙混其心亦不可信且其近日辦事動輒舛誤頓不如從前之精到亦旣屢令軍機大臣傳諭嚴飭矣然人材難得尙望其改過自新今竟敢爲欺飾豈可復膺封疆重寄明山著卽解任聽候部議陝甘總督員缺著吳達善調補吳達善未到任之先著陝西巡撫文綬前往暫署陝西巡撫印務著布政使勒爾謹暫行護理湖廣總督員缺著富明安調補吳達善見在兼署湖南巡撫德福見又署理雲貴總督其缺未便久懸永德著

調補湖南巡撫其河南巡撫員缺著何煇補授仍兼管河務鍾音

著補授閩浙總督其福建巡撫員缺著余文儀補授○命河南購

麥十萬石運京備糴○壬寅以巴延三爲河南布政使由直隸大名道遷

○癸卯命減秋審緩決三次人犯罪○甲辰以吳紹詩爲刑部侍

郎由刑部郎中遷○乙巳諭立決人犯當省刑之際暫緩行刑著爲令○

乙巳諭昨因阿桂奏請大舉以斷不可行之事用智取巧飾詞瀆

告實爲喪盡天良故降旨交部嚴加議處並令明白回奏今據阿

桂奏到自知咎無可逭仍復支離其說以自售其遁飾之長阿桂

尙得謂之稍有人心者乎緬匪兇頑詭詐恃其有險可憑兼之水

土惡劣我將士深入非宜意在激我用兵彼得坐乘其利故斷不

可墮其術中卽以徵調饋運而計方今帑藏充盈八旗又多勁旅

用非不膽力非不給無難大舉集事第因辦理軍務以後馬騾不

及孽生並不欲以轉輸執役之勞屢煩我內地民力前降諭旨甚明實深悉其事爲天時地利所限非可拂逆而行所謂止乎其所以不得不止若漢唐宋明之君臣習尚怯懦託於大度包容而飾爲得人不足臣得地不足守之虛言朕不肯爲也但緬匪於乞降納款之後旋生反悔竟不歸我虜人且敢將總督所遣持檄責催之蘇爾相拘留賊寨其罪惡實甚若竟置之不問則與唾面自乾何異國家當全盛之時顧聽么磨之鴟張自恣不爲控制威令安在因議用偏師襲擊積以歲年使賊匪不得休息以疲其力此亦事之所不可少而理之斷不能已者今阿桂乃謂賊性狡猾若我兵前往掩襲賊或豫行躲避乘閒取路轉滋擾我沿邊土司及猺夷地方其說尤爲荒誕其心更怯懦不堪賊匪不過負其險阻恃其瘴癘是以我兵難於深入制勝耳若至平地接仗賊匪不但不能

敵我八旗勁旅卽綠旗無用之兵賊人亦不能撓其鋒也且彼設果有窺伺近邊之意我卽不往彼亦能來豈有因我襲擊彼方爲報復之理大臣身膺重寄不能視國事如己事輒復構此謬談妄思罷役歸家可乎阿桂旣無以自解其前言其辨愈曲其設心愈不可問伊自委任滇省軍務以來全不知自效惓惓稍圖出力始終惟逞其小智昧良妄奏若此難以望其後效實不可復示優容但竟令罷斥閒居轉得遂其畏葸自全之願阿桂著照部議革任仍留於軍營在兵丁上行走效力贖罪溫福著馳驛前往雲南署理副將軍事務此旨卽著溫福齋往宣諭並將此通諭知之又諭阿桂辦理雲南軍務毫無端緒將伊治罪之處已另降諭旨矣若止坐罪一人不足蔽辜其子阿廸斯著發遣廣西右江鎮阿彌達著發遣廣東雷瓊鎮交該部於本日卽行發遣○丙辰諭王公之

女予以格格品級指配之人封爲額駙原係推恩本支之誼但年
久生齒日繁世代漸遠若不論遠近惟視王公等品級予封近派
遠支轉無區別應如何辦理之處著宗人府會同軍機大臣定擬
具奏尋奏王公等之女指配與蒙古王公台吉者遵行已久仍照
例辦理其餘指配與八旗勳舊子弟者自 世祖章皇帝子孫之
女照例按王公品級封爲格格額駙其餘王公之女止以王公品
級封爲格格額駙虛銜毋庸給俸再向來在京王公格格額駙較
蒙古王公台吉之格格額駙所得俸過優應酌減一等得旨京城
近支格格額駙等應得之俸亦如蒙古格格額駙等應得之數一
體按其品級給與銀段伊等既在京居住著加恩按照伊應得銀
數仍賞給米石餘依議○丁巳諭吳紹詩之子郎中吳垣係特調
刑部之員不必迴避○諭匪犯糾眾地方官三月以內擒捕者免

議著爲令○庚申諭禮部所奏向來一二品大臣身後未具遺本及該處未經具奏者禮部將應否賜卹之處奏聞請旨嗣後請將奉旨予卹者照例具題其餘槩毋庸置議等語大臣身後議卹乃國家飾終令典未便槩行停止嗣後一品文武大臣身故除已經特旨予卹外著吏兵二部及各該旗隨時咨報禮部該部將應否議卹之處專摺具奏候朕酌量加恩其二品大臣著照部議毋庸奏請○壬戌命高晉爲文華殿大學士兼禮部尙書仍留兩江總督任召阿爾泰入閣辦事以德福爲四川總督○丙寅諭軍機大臣等據阿爾泰等奏革布什咱頭人勾連大金川占據革地官寨革酋不知下落見委遊擊宋元俊馳往嚴諭飭調土兵土練前赴彈壓並陸續起程親往督辦等語已於摺內批示矣革布什咱土司索諾木多布丹素行苛虐召禍實由自取而蠻夷互相仇殺亦

屬常情其事原可無庸查辦但金川土舍索諾木幼小罔識利害而革地頭人又復頑劣不法則懾以兵威自不可少阿爾泰等一聞員弁稟報卽飭調兵練前赴分布防察並先後親往確勘情形相機辦理頗爲妥速協宜卽摺內所稱俟招復故土後擇革酋支派中眾所悅服者立爲土司亦必應如此措置惟查追兇番正法一節此時尙宜姑緩該頭人敢於勾引金川占據革地戕害革酋其情固屬可惡但見在金川蠻眾分據革地寨落擾攘未甯若速於窮治罪人持之過急恐其聞風畏懼鋌而走險更與金川固結猝難解散轉致不成事體阿爾泰等至彼惟當遣人前往宣諭大金川以郎卡自經懲創以來承受天朝撫輯深恩極爲恭順今索諾木父故未久輒擅發兵襲占鄰地實爲非理念索諾木年幼無知且受人慫恿姑從原恕特遣員明白曉諭該土舍速將土兵全

行撤回仍還革夷土地本閣部亦不復加深究使其曉然於恩威禍福自當斂眾歸巢阿爾泰等便可撫定其地擇立革酋宗派承襲土司俟一切甯貼後再行從容根究兇番按法處治亦不至慮其漏網如此辦理於事機較有次第不致張皇雖明正土司稍有驚慌情形而見有兵練在彼彈壓亦自足安其心阿爾泰等務須鎮靜查辦行所無事方爲合宜將此詳諭知之仍將目下情形速行奏聞○貴州巡撫李湖奏思州府一缺前撫臣宮兆麟奏裁經部議准臣思黔省僻處邊圉在在俱係土司苗寨惟藉大員管理與內地郡守體制迥別況思州爲滇黔門戶川楚要津夙爲奸匪出沒之區若以原轄之玉屏青谿分隸銅仁鎮遠二府鞭長莫及請仍留思州府就近駐紮使事權歸一得旨所奏是著依議行
六月庚午朔諭明山著發往烏魯木齊自備資斧效力贖罪換徐

續回京○辛未諭孫可望子孫所有世職嗣後不必承襲○丙子諭據梁國治奏德安府同知賈鍾琪先經吏部推升福建福甯府知府因該員赴滇辦銅谷部開缺另選今察看該員才具中平難勝知府之任請敕部毋庸再選等語自應如此辦理至將該員請以升銜留任並不聲明送部引見則所謂知其一不知其二也此等論俸推升人員大率循分供職者居多第因在任事簡職閒處分本少是以俸滿升遷較易其中原未必有出色之員昨因推升知府內經該督撫驗係堪勝者向令出具考語恐久之或滋流弊曾降旨停其注考令送部引見定奪至此等不能勝任府缺之員其人才較彼尤遜若不送部引見竟准以升銜留任是庸才既得以藏拙且省其正署交代往來跋涉之勞安坐而得叨榮頂帶爲若輩別開捷徑於事體殊覺非宜恐衰朽無能者並得藉以姑容

戀棧其弊更無所底止嗣後各省推升知府人員該督撫驗係堪勝者仍遵前旨辦理外其不能勝任之員亦著一體送部引見或仍令回任或留部另用候朕臨時分別降旨其向例升銜留任未免過優應改照卓異人員例加一級以示平允著爲令○丁丑撥陝西庫銀二百萬兩於甘肅備用○己卯諭伊犁見在投誠之土爾扈特等其大台吉均令來避暑山莊朝覲著派固倫額駙色布騰巴勒珠爾馳驛往迎所帶侍衛章京十員兵丁十名一併馳驛○壬午諭原任大學士陳宏謀老成敦樸才品端方中外宣勞恪勤素著去歲以來屢因抱恙未痊懇請解任調理節經降旨慰留今春復據以衰病日深堅請開缺回籍念其情辭懇切俯俞所請親爲賦詩寵行加賜冠服並命伊孫隨歸侍養沿途令地方官照料護行以期長途安穩昨東巡回鑾時伊於寶稼營行在陛辭見

其精神尙不至疲憊猶冀遄歸故里得以頤志蠲疴今聞於韓莊
舟次溘逝深爲軫悼著入祀賢良祠並於歸櫬抵家之日加祭一
壇所有應得卹典仍著該部察例具奏尋予祭葬諡文恭○丙戌
諭軍機大臣等昨據巴圖濟爾噶勒奏此次投誠之士爾扈特情
形不可深信請由喀爾喀賽因諾顏阿爾台烏梁海杜爾伯特扎
哈沁等部落內選派二萬兵備用等語喀爾喀等素畏出兵若派
兵滿萬伊等未免驚擾從前辦理準噶爾時亦用兵萬餘今於喀
爾喀派兵五千由別部選派五千然此項不過防備尙無用也渥
巴錫並未犯罪舍楞前雖獲罪迹似可疑但其屬下能有幾人渥
巴錫旣已投誠舍楞勢孤同來亦應有之事若謂俄羅斯明知伊
等投誠佯爲不知或同商僞順斷無是事朕謂其投誠十分之九
或渥巴錫誠欲投降但因舍楞一人教唆觀望猶豫應卽曉諭渥

巴錫並其屬下人眾言聞爾等來投卽行奏聞大皇帝大皇帝降旨伊等棄游牧而投誠意在承受朕恩若遣頭目入覲朕必加恩卽舍楞雖係獲罪之人今旣知悔前非朕必恩施格外並曉諭渥巴錫爾俱係阿玉奇汗之嗣並無干冒大皇帝之處今舍楞尙施恩免罪爾等無罪之人自必更沛殊恩毋因舍楞一人耽誤己事如此曉示伊等若盡行投誠則無庸議儻舍楞稍存異心爾等乘機設間令伊等離異舍楞屬人無多爾等會同渥巴錫合兵辦理亦不費力若渥巴錫舍楞均無投誠之意卽須酌量整兵重懲以色布騰巴勒珠爾爲將軍舒赫德巴圖濟爾噶勒爲參贊大臣帶兵前進務從重勦辦伊勒圖仍守城備辦軍需伊犁地方兵丁若干是否敷用如何豫備馬匹軍需之處亦宜早爲籌畫著傳諭色布騰巴勒珠爾舒赫德等務宜妥協辦理再伊犁烏魯木齊塔爾

巴哈台等路驛站關繫甚要應遣幹員不時巡查以防賊匪擾攘然此亦不過籌畫豫備想斷無是事也大抵此事惟在色布騰巴勒珠爾舒赫德等相機辦理不必過爲疑慮將此由六百里加緊發往○丁亥諭據伊勒圖舒赫德等奏稱土爾扈特台吉策伯克多爾濟遣格隆訥木庫巴勒珠爾察桑集布贊等請安並將其投來情形具奏看伊等力窮遠來投誠屬實一切迎撫安插所關甚要此內渥巴錫係土爾扈特阿玉奇汗之嗣原係無罪之人因與俄羅斯之俗不同是以來投應遣人往迎想此際納旺等已由哈薩克回至伊犁再添派碩通同往於事有益舒赫德等接見台吉時卽行曉示前我將軍大臣等聞爾等投誠之信奏聞大皇帝大皇帝降旨爾等俱係久居準噶爾之人與俄羅斯之俗不同不能安居聞厄魯特等受朕重恩帶領妻子遠來投順甚屬可憫理宜

急加撫綏安插遣大頭人來京入覲但念爾等均未出痘京城暑熱甚不相宜避暑山莊涼爽如九月中旬可以到彼卽帶領前來否則俟朕明年臨幸時再來入覲朕與車凌車凌烏巴什一例施恩再策伯克多爾濟所遣格隆卽係喇嘛我天朝定例凡投誠之各部夷人不易其習爾等欲往西藏熬茶亦無不准見今西藏隸我版圖達賴喇嘛班禪額爾德尼黃教中無有逾此者今特派御前大臣親王固倫額駙色布騰巴勒珠爾領侍衛官員多人前赴伊犁迎接爾等再舍楞畏懼前罪故在後隊起程觀望納旺等迎見渥巴錫等時聞舍楞信息卽尋往見面曉示云大皇帝降旨舍楞等雖係獲戾之人若係擒獲自當治罪今自行投誠儻將伊等究治非惟不足揚威抑且貽笑於各部落朕爲天下共主凡投誠之人無不施恩況舍楞等力窮投誠朕斷不究其前罪務與渥

巴錫等一體加恩再伊等陸續前來辦理安插較易此內除杜爾伯特烏梁海人等令駐紮該處外其土爾扈特綽羅斯等理宜指地另居若指與伊犁之沙喇伯勒等處附近西邊易於逃竄烏嚕木齊一帶又距哈密巴里坤卡路甚近朕意令居住塔爾巴哈台東科布多西之額爾齊斯博羅塔拉額密勒齊爾等處方妥朕前雖降旨令色布騰巴勒珠爾舒赫德等統領進兵因伊勒圖未經戰陣令在伊犁坐辦今安插此等伊勒圖係將軍在伊犁多年不可稍爲推諉再巴圖濟爾噶勒亦熟悉該處情形彼此籌酌何項人等指令何處居住作何安插卽速奏聞再伊等投誠未免窮迫應賞銀兩及接濟馬匹牲畜著傳諭舒赫德卽酌量接濟但彼等生性詭詐不可深信恐僞作力窮乘我無備亦當豫防舒赫德等辦理安插時須密爲留意此旨由六百里加緊發往○命各部院

慎選新疆辦事司員年六十以上者毋得保送○壬辰御前大臣
額駙色布騰巴勒珠爾奏查由俄羅斯逃出之土爾扈特厄魯特
與準噶爾之厄魯特不同另一部落阿玉奇汗之嗣原未投誠亦
非準噶爾所屬聞土爾扈特之厄魯特歸俄羅斯不過四五十年
見今車凌烏巴什沙克都爾曼濟之父前帶領萬戶出土爾扈特
向準噶爾地方居住伊等之俗崇信黃教是以前曾懇請赴藏熬
茶俄羅斯與回教相似經教不同互相不睦今準部全平想伊犁
等處閒曠渥巴錫等率領八九萬戶投誠欲往伊犁行伊黃教皆
屬應有之事誠如諭旨不必過疑一切當謹遵辦理儻不投誠卽
行豫備勦辦得旨無庸如此辦理矣○甲午諭軍機大臣等據阿
爾泰等奏查辦革布什咱情形一摺內稱郎卡之子索諾木懇乞
將革布什咱地方百姓賞給當差等語此斷不可允行前因革布

什咱頭人內變句結金川占據其地阿爾泰等已親往督辦因令遣員宣諭使其曉然於恩威禍福如索諾木速將土兵撤回仍還革夷土地斂眾歸巢原可就事完結不加深究今索諾木乃請將革布什咱之百姓賞給當差顯係覬覦土境妄思占據此則斷不可稍涉遷就致彼無所顧忌滋生事端至革布什咱土司雖已被害仍須如前奏所云擇其近支眾所悅服者立爲土司豈有歸併金川之理看來索諾木年幼愚頑罔識利害阿爾泰若稍露就便完局之意使彼得逞其欲勢必於附近土司漸圖蠶食又復何所底止正不可不防其漸此時若過涉張皇遽加兵力固非所宜若一味姑息游移急圖了事於邊境大有關礙著傳諭阿爾泰等務須酌量機宜詳慎籌度以期經久無弊方爲妥善前有旨令彰寶到滇後德福卽赴四川總督之任阿爾泰入關辦事今金川與革

三
布什咱構釁一節其情形乃阿爾泰所深知且業已經手董辦不
便遽易生手見有旨令德福由滇赴京陛見阿爾泰可將革布什
咱一事辦理完妥並籌及善後事宜俟德福由京赴川後再行起
程來京仍將金川土舍於奉到傳諭後情形若何迅速奏聞